

सिरि उसहदेवसामिस्स णमो । सिरि गोडी - जिराउला - सव्वोदययासण्णहाणं णमो । नमोऽत्थुणं समणस्स भगवओ महइमहावीरवद्धमाणसामिस्स । सिरि गोयम - सोहम्माइ सव्व गणहराणं णमो । सिरि सुगुरु - देवाणं णमो । **श्रीऔपपातिकोपांगसूत्रम्** तेणं कालेणं तेणं समएणं चंपा नामं नयरी होत्था रिद्धत्थिमियसमिद्धा पमुइयजण(जणुज्जाण पा०)जाणणवया आइण्णजणमणुस्सा हलसयसहसंकिट्टविकिट्टलट्टपण्णत्तसेउसीमा कुक्कुडसंडेअगामपउरा उच्छुजवसालिकलिया (मालिणीया पा०) गोमहिसगवेलगप्पभूता आयरवंतचेइयजुवइविविह (अरिहन्तचेइयजणवयवि० सुयागचित्तचेइयजुय० पा०) सण्णिविट्ठबहुला उक्कोडियगाय(गाहा पा०)गंठिभेयभडतक्करखंडरक्खरहिया खेमा णिरुवद्वा सुभिक्खा वीसत्थसुहावासा अणेगकोडिकुडुंबियाइण्णणिवुयसुहा णडणट्टगजल्लमल्ल मुट्ठियवेलंबयकह गपवगलासग-आइक्खगलंखमंखतूणइल्लतुंबवीणियअणेगता लायराणुचरिया आरामुज्जाण अगडतलागदीहिय वप्पि णिगुणोववेया (नंदणवणसन्निभप्पगासा पा०) उव्विद्धविउल गंभीरखायफलिहा चक्कगयमसंडि ओरोहयग्घिजमलक वाडघणदुप्पवेसा धणुकुडिल वंकपागारपरिक्खित्ता कविसीसयवट्टरइय संठियविराय माणा अट्टालय चरियदार गोपुरतोरणउण्णयसुविभत्तरायमग्गा छेयायरियरइयदढफलिहइंदकीला विवणिवणिच्छेत्त(छेय पा०)सिप्पियाइण्णणिवुयसुहा सिंधाडगतिगचउक्कचच्चर(चउम्मुहमहापहपहेसुपा०)पणियावणविविहवत्थुपरिमंडिया सुरम्मा नरवइपविइण्णमहिवइपहा अणेगवरतुरगमत्तकुं जररहपहकरसीयसंदमाणीयाइण्णजाणजुग्गा विमउलणलिणिसोभियजला पंडुरवरभवनसण्णिमहिया उत्ताणणयणपेच्छणिज्जा पासादीया दरिसणिज्जा अभिरूवा पडिरूवा ।१। तीसे णं चंपाए णयरीए बहिया उत्तरपुरच्छिमे दिसिभाए पुण्णभद्दे नामं चेइए होत्था, चिराइए पुव्वपुरिसपण्णत्ते पोराने सद्दिए वित्तिए (कित्तिए पा०)णाए सच्छत्ते सज्झए सघंटे (सपडागे पा०) पडागाइपडागमंडिए सलोमहत्थे कयवेयद्दिए लाउल्लोइयमहिए गोसीससरसरत्तचं दणदहरदिण्णपंचंगुलितले उवचियचंदणकलसे चंदणघडसुकयतोरणपडि दुवारदेसभाए आसत्तोसत्तविउलवट्टवग्घा रियमल्लदामकलावे पंचवण्णसरससुर हिमुक्कपुप्फपुंजोवयारकलिए कालागुरुपवरकुंदुरुक्कतुरक्कडज्झंतधूवमघमघंतगंधुब्बुयाभिरामे सुगंधवरगंधगंधिए गंधवट्ठिभूए णडणट्टगजल्लमल्ल-मुट्ठियवेलंबयपवगकहगलासगआइक्खलंखमंखतूणइल्लतुंबवीणियभुय- गमागहपरिगए बहुजणजाणवयस्स विस्सुयकित्तिए बहुजणस्स आहुणिज्जे पाहुणिज्जे अच्चणिज्जे वंदणिज्जे नमंसणिज्जे पूयणिज्जे सक्कारणिज्जे सम्माणणिज्जे कल्लाणं मंगलं देवयं चेइयं विणएणं पज्जुवासिणिज्जे दिवे सच्चे सच्चोवाए सण्णिहियपाडिहेरे जागसहस्सदायभागपडिच्छए (जागभागदायसहस्सपडिच्छए पा०) बहुजणो अच्चेइ आगम्म पुण्णभद्दं चेइयं ।२। से णं पुण्णभद्दे चेइए एक्केणं महया वणसंडेणं सव्वओ समंता संपरिक्खत्ते, से णं वणसंडे किण्हेकिण्होभासे नीले नीलोभासे हरिए हरिओभासे सीए सीओभासे णिद्धे णिद्धोभासे तिक्वे तिक्वोभासे किण्हे किण्हच्छाए नीले नीलच्छाए सीए सीयच्छाए णिद्धे णिद्धच्छाए तिक्वे तिक्वच्छाए घणकडिअतडिच्छाए रम्मे महामेहणिकुरंभभूए, ते णं पायवा मूलमंतो कंदमंतो खंधमंतो तयामंतो सालमंतो पवालमंतो पत्तमंतो पुप्फमंतो फलमंतो बीयमंतो (हरियमंतो पा०) अणुपुव्वसुजायरुइलवट्टभावपरिणया एक्कखंधा अणेगसाला अणेगसाहप्पसाहविडिमा अणेगनरवामसुप्पसारिअअग्गेज्झघणविउबद्धखंधा (पाईणपडिणाययसाला उदीणदाहिणविच्छण्णा ओणयनयपणयविप्पहाइयओलंबपलंबलंबसाहप्पसाहविडिमा अवाईणपत्ता अणुईण्णयत्ता पा०) अच्छिदपत्ता अविरलपत्ता अवाईणपत्ता अणईअपत्ता निद्धुयजरढपंडुपत्ता णवहरियभिसंपत्तभारंधकार गंभीरदरिसणिज्जा उवणिग्गयणवतरुणपत्तपल्लवकोमलउज्जलचलंतकिसलयसुकुमालपवासोहिवरंकुरग्ग सिहरा णिच्चं कुसुमिया णिच्चं माइया णिच्चं लवइया णिच्चं थवइया णिच्चं गुलइया णिच्चं गोच्छिया णिच्चं जमलिया णिच्चं जुवलिया णिच्चं विणमिया णिच्चं पणमिया णिच्चं कुसुमिय माइयलवइयथवइयगुलइय गोच्छियजुवलियविणमियपण मियसुविभत्तपिंडमंजरिव- डिसयधरा सुयबरहिणभय णसालकोइलकोहंगकभिंंगारककोंडल-

सौजन्य :- गच्छाधिपति विजयरामसूरि म.सा. (डहेलावाला)ना अज्ञापतिनी प.पू. विदूषी साध्वी श्री रत्नप्रभाश्री७ म.सा.ना शिष्या प.पू. साध्वीश्री अक्षयरभाश्री७ म.सा. ना सिद्धितप प.पू. साध्वीश्री प्रियत्नाप्रभाश्री७ म.सा. ना वर्षातप निमिते अेक सद्गृहस्थ (अमदावाड)

जींजीवंजीवकणं दीमुहकविलपिंगलक्खकारंडचक्कवायकलहंससारसअणेगसउणगणमिहुणविरइयसद्दुण्णइयमहुरसरणाइए सुरम्मे
 संपिंडियदरियभमरमरहुकरिपहकरपरिलिन्तत्तच्छप्पयकुसुमासवलोलमहुरगुमंतगुंतगुंतदेसभागे अब्भंतरपुप्फफले बाहिरपत्तोच्छणे पत्तेहि य पुप्फेहि य
 उच्छण्णपडिच्छण्णे (साउफले नीरोयए अकंटए णाणाविहगुच्छ गुम्ममंडवगरम्ममंडवगरम्मसोहिए पा०) विचित्तसुहकेउभूए (सेउकेउबहुले पा०)
 वावीपुक्खरिणीदीहियासु य सुनिवेसियरम्मजालहरए पिंडिमणीहारिम सुगंधिसुहसुर भिमणहरं च महया गंधद्धणिं मुयंता णाणा
 विहगुच्छगुम्ममंडवकघरकसुहसेउकेउबहुला अणेगरहजाणजुगसिबियपविमोयणा सुरम्मा पासादीया दरिसणिज्जा अभिरूवा पडिरूवा ।३। तस्स णं वणसंडस्स
 बहुमज्झदेसभाए एत्थ णं महं एक्के असोगवरपायवे (दूरोवगयकंदमूलवट्टलट्टसंठियसुसिलिट्ठघणमसिणिद्धसुजायनिरुवहउव्विद्धपवरखंधी पा०) अणे
 गनरपवरभुयागेज्झो कुसुमभरसमोनमंतपत्तलविसालसालो महुकरिभमरगणगुमगुमाइयनिलिंतउड्ढित्तसस्सिरीए णाणासउणगमिहुणसुमहुरकण्णसुहपलत्तसद्दमहुरे
 पा०) पणत्ते, कुसविकुसविसुद्धरुक्खमूले मूलमंते कंदमंते जाव पविमोयणे सुरम्मे पासादीए दरिसणिज्जे अभिरूवे पडिरूवे, से णं असोगवरपायवे अण्णेहिं बहूहिं
 तिलएहिं लउएहिं छत्तोवेहिं सिरीसेहिं सत्तवण्णेहिं दीहवण्णेहिं लोद्धेहिं धवेहिं चंदणेहिं अज्जुणेहिं णीवेहिं कुडएहिं सव्वेहिं फणसेहिं दाडिमेहिं सालेहिं तालेहिं
 तमालेहिं पियएहिं पियंगूहिं पुरोवगेहिं रायरुक्खेहिं णंदिरुक्खेहिं सव्वओ समता संपरिक्खित्ते, ते णं तिलया लउया जाव णंदिरुक्खा कुसविकुसविसुद्धरुक्खमूला
 मूलमंतो कंदमंतो एएसिं वण्णओ भाणियव्वो जाव सिबियपविमोयणा सुरम्मा पासादीया दरिसणिज्जा अभिरूवा पडिरूवा, ते णं तिलया जाव णंदिरुक्खा अण्णेहिं
 बहूहिं पउमलयाहिं णागलयाहिं असोअलयाहिं चंपगलयाहिं चूयलयाहिं वणलयाहिं वासंतियलयाहिं अइमुत्तलयाहिं कुंदलयाहिं सामलयाहिं सव्वओ समंता
 संपरिक्खित्ता, ताओ णं पउमलयाओ णिच्चं कुसुमियाओ जाव वडिंसयधरीओ पासादीयाओ दरिसणिज्जाओ अभिरूवाओ पडिरूवाओ (तस्स णं
 असोगवरपायवस्सउवरि बहवे अट्ठ अट्ठमंगलागा पं० तं०- सोवत्थिय सिरिवच्छ नंदियावत वद्धमाणग भद्दासण कलस मच्छ दप्पणा सव्वरयणामया अच्छा
 सण्हा मण्हा घट्ठा नीरया निम्मला निप्पंका निक्कंडच्छाया सप्पहा समिरीया सउज्जोया पासादीया०, तस्स णं असोगवरपायवस्स उवरिं बहवे किण्हचामरज्झया
 नीलचामरज्झया उप्पपट्ठा वइरामयदंडा जल यामल गंधिया सुरम्मा पासादीया, तस्सणं असोगवरपायवस्स उवरि बहवे, छत्ताइच्छत्ता पडागाइपडाया घण्टा-
 जुयला उप्पलहत्थगा पउमहत्थगा कुमुयहत्थगा कुसुमहत्थगा नलिणहत्थगा सुभगहत्थगा सोगंधियहत्थगा पुंडरीयहत्थगा महापंडरीयहत्थया सयपत्तहत्थया
 सहस्सपत्तहत्थया सव्वरयणामया अच्छा जाव पडिरूवा पा०) तस्स णं असोगवरपायवस्स हेट्ठा ईसिंखंधसमल्लीणे एत्थ णं महं एक्के पुढविसिलापट्टए पं०
 विक्खंभायामउस्सेह सुप्पमाणे किण्हे अंजणघणकिवाण कुवलय हलधरकोसेज्जायसीकेसकज्ज लंगीखंजणसिंभेदरिद्वयजंबूफल असणसणसण बंधणणी-
 लुप्पलपत्तनिकर अयसिकुसुम प्पगासे मरकतमसारकलित्तण कीयरासिवण्णे णिद्धघणे अट्टसिरे आयंसयतलोवमे सुरम्मे ईहामियउसभतुरगनरमगरविहभवाल
 गकिण्णरुरुसरभचमरकुंजरवणलयपउम लयभत्तिचित्ते आईणगरूयबूरणवणी ततूलफरिसे सीहासणसंठिए पासादीए दरिसणिज्जे अभिरूवे पडिरूवे ।५। तत्थ णं
 चंपाए णयरीए कूणिए णामं राया परिवसइ, महयाहिमवंतमहंतमलयमंदरमहिंदसारे अच्चंतविसुद्धदीहरायकुलवंससुप्पसूए णिरंतरं रायलक्खणविराइअंगमंगे
 बहुजणबहुमाणे पूजिए सव्वगुणसमिद्धे खत्तिए मुइए मुद्धाहिसित्ते माउपिउसुजाए दयपत्ते सीमंकरे सीमंधरे खेमंकरे खेमंधरे मणुस्सिदे जणवयपिया जणवयपाले
 जणवयपाले जणवयपुरोहिए सेउकरे केउकरे णरपवरे पुरिसवरे पुरिससीहे पुरिसवग्घे पुरिसासीविसे पुरिसपुंडरीए पुरिसवरगंधहत्थी अइढे दित्ते वित्ते
 विच्छिण्णविउलभवणसयणासणजाणवाहणाइण्णे बहुधणबहुजायरूवरयते आओगपओगसंपउते विच्छड्डिअपउरभत्तपाणे बहुदासीदासगोमहिसगवेलगप्पभूते
 पडिपुण्णजंतकोसकोट्टागाराउधागारे बलवं दुब्बलपच्चामित्ते ओहयकंटयं निहयकंटयं मलिअकंटयं उद्धियकंटयं अकंटयं ओहयसत्तु निहयसत्तु मलियसत्तु उद्धिअसत्तु
 निज्जयसत्तु पराइअसत्तु ववगयदुब्भिक्खं मारिभयविप्पमुक्कं खेमं सिवं सुभिक्खं पसंत(पसंताहिय पा०)डिंबडमरं रज्जं पसासे(हे पा०)माणे विहरइ ।६। तस्स णं

कोणियस्स रण्णो धारिणी नामं देवी होत्था सुकुमालपाणिपाया अहीणपडिपुण्ण पंचिंदियसरीरा लक्खणवज्जण गुणोववेआ माणुम्माणप्पमाण पडिपुण्णसुजायसव्वंगसुंदरंगी ससिसोमाकारकंत पियदंसणा सुरूवा करयलपरिमि अपसत्थतिवलियमज्झा कुंडलुल्लिहिअ (पीण पा०) गंडलेहा कोमुइरयणियरविमलपडिपुण्णसोमवयणा सिंगारागारचारुवेसा संगयगयहसिअभणिअविहिअविलाससललिअसंलावणिउणजुत्तोवयारकुसला (प्र० सुंदरथणजघणवयणकरचरणनयणलावणविलासकलिया) पासादीओ दरिसणिज्जा अभिरूवा पडिरूवा कोणिएणं रण्णा भंभसारपत्तेणं सद्धिं अणूरत्ता अविरत्ता इट्ठे सद्धफरिसरसरूवगंधे पंचविहे माणुस्सए कामभोए पच्चणूभवमाणी विहरति ।७। तस्स णं कोणिअस्स रण्णो एक्के परिसे विउलकयवित्तिए भगवओ पवित्तिवाउए भगवओ तद्देवसिअं पवित्तिं णिवेएइ, तस्स णं पुरिसस्स बहवे अण्णे पुरिसा दिण्णभति भत्तवेअणा भगवओ पवित्तिवाउआ भगवओ तद्देवसियं पवित्तिं णिवेदेति ।८।तेणं कालेणं० कोणिएराया भंभसारपुत्ते बाहिरियाए उवट्ठाण सालाए अणे गगणनाय ग दंडनायगरा ईसरतलवर माडंबिअकोडुंबि अमंति महामंतिगणोदोवारिअमच्चचेडपीढमदनगर निगमसेट्ठिसेणा वइसत्थवाहदूत संधिवाल सद्धिं संपरिवुडे विहरइ ।९। तेणं कालेणं० समणे भगवं महावीरे आइगरे तित्थगरे सहसंबुद्धे पुरिसुत्तमे पुरिससीहे पुरिसवरपुंडरीए पुरिसवरगंधहत्थी अभयदए चक्खुदए मग्गदए सरणदए जीवदए दीवो ताणं सरणं गई पइट्ठा धम्मवरचाउरंतचक्कवट्ठी अप्पडिहयवरनाणदंसणधरे विअट्ठच्छउमे (अरहा पा०) जिणे (केवली पा०) जाणए तिण्णे तारए मुत्ते मोयए बुद्धे बोहए सव्वणू सव्वदरिसी सिवमयलमरुअमणंतमक्खयमव्वाबाहामपुणरावत्तिअं सिद्धिगइणामधेयं ठाणं संपाविउकामे अरहा जिणे केवली सत्तहत्थुस्सेहे समचउरंससंठाणसंठिए वज्जरिसहनारायसंघयणे अणुलोमवाउवेगे कंकग्गहणी कवोयपरिणामे सउणिपोसपिट्ठंतरोरुपरिणए पउमुप्पलगंधसरिस निस्साससुरभिवयणे छवी निरायंकउत्तमपसत्थअइसेयनिरुवमपले (तले पा०) जल्लमल्लकलंकसेयरयदोसवज्जियसरीरे निरुवलेवे छायाउज्जोइअंगमंगे घणनिचियसुबद्धलक्खणुण्णयकूडागारनिभपिंडिअगसिरए (सामलिबोंडघणनिचियच्छोडियमिउविसयपसत्थसुहुमलक्खणसुगंधसुंदर पा०) भुअमोअगभिंने लकज्जलपहिट्ठभमरगणणिद्धनिकुंरुंबनिचियकुं चियपयाहिणा- वत्तमुद्धासिरए पा०) दालिमपुप्फप्पगासतवणिज्जसरिसनिम्मलसुणिद्धके संतके सभूमी घण(निचिय)छत्तागारुत्तमंगदेसे णिव्वणसमलट्ठमट्ठचंदद्धसमणिडाले उडुवइपडिपुण्णसोमवयणे अल्लीणपमाणजुत्तसवणे सुस्सवणे पीणमंसलकवोलदेसभाए आणामियचावरुइलकिण्हम्भराइ(संठियसंगयआययसुजाय पा०) तणुकसिणणिद्धभमुहे अवदालिअपुंडरीयणयणे कोआसिअधवलपत्तलच्छे गरुलायतउज्जुतुंगणासे उवचिअसिलप्पवालबिंबफलसणिभाहरोट्ठे पंडुरससिस- अलविमलणिम्मलसंखगोक्खीरफेणकुंददंगरयमुणालिआधवलदंतसेढी अखंडदंते अप्फुडिअदंते अविरलदंते सुणिद्धदंते सुजायदंते एगदंतसेढीविव अणेगदंते हुयवहणिद्धतधोयतत्ततवणिज्जरत्तवलतालुजीहे अवट्ठियस विभत्तचित्तमंसूमंसलसंठियपसत्थसददूलविउलहणूए चउरंगलसुप्पमाणकंबुवरसरिसग्गीवे वरमहिसवराहसीहसददूलउसभनागवरपडिपुण्णविउलक्खंधे जुगसन्निभपीणरइयपीवर पउट्ठसुसंठियसुसिलिट्ठविसिट्ठघणथिरसुबद्धसंधी (पकुट्ठसंठियउवचियघणथिरसुसंबद्धसुनिगूढपव्वसंधी पा०) पुरवरफलहवट्ठियभुए भुअईसरविउलभोगआदाणपलिहउच्छूढदीहबाहू रत्ततलोवइयमउमंसलसुजायलक्खणपसत्थअच्छिइजालपाणी पीवर(वट्ठियसुजाय पा०) कोमलवरंगुली आयंबतंबतलिणसुइरुइलणिद्धणक्खे चंदपाणिलेहे सूरपाणिलेहे संखपाणिलेहे चक्कपाणिलेहे दिसासोत्थिअपाणिलेहे चंदसूरसंखचक्कदिसासोत्थिअ(विभत्तसुविरइ पा०) पाणिलेहे (अणेगवरलक्खणुत्तिमपसत्थसुइरइयपाणिलेहे पा०) कणगसिला- तलुज्जलप सत्थसमतलउवचिय विच्छिण्णपिहुलवच्छे सिरिवच्छंकियवच्छे (उवचियपुरवर कवाड विच्छिण्णपिहुलवच्छे, कणयसिलाय लुज्जलपसत्थ समतलसिरिवच्छे रइयवच्छे पा०) अकरंडु अकणगरुययनिम्मल सुजायनिरुवहय देहधारी अट्ठसहस्सपडि पुण्णवरपुरिसलक्खण धरे सण्णयपासे संगयपासे सुंदरपासे सुजायपासे मियमाइअपीण रइअपासे उज्जुअसमसहियज्जतणुकसिणणिद्धआइजलडहरमणिज्जरोमराई झसविहगसुजायपीणकुच्छी झसोदरे सुइकरणे पउमविअडणाभे

गंगावत्तकपयाहिणावत्ततरंगभंगुररविकिरणतरुणबोहियअकोसायंतपउमगंभीरवियडणाभे साहयसोणंदमुसलदप्पणणिकरियवरकणगच्छरुस-रिसवरइरवलिअमज्जे पमुइयवरतुरगसीह(अइरेग पा०) वरवट्टियकडी वरतुरगसुजायसु(पसत्थवरतुरग पा०)गुज्झदेसे आइण्णहउव्व णिरुवलेवे वरवारणतुल्लविक्रमविलसियगई गयससणसुजायसन्निभोरू समुग्गणिमग्गगूढजाणू एणीकुरुविंदावत्तवट्टाणुपुव्वजंघे संठियसुसिलिट्ठगूढगुप्फे सुप्पइट्टियकुम्मचारुचलणे अणुपुव्वसुसहंयं(यपीवरं पा०)गुलीए उण्णयतणुतंबणिद्धणक्खे रत्तुप्पलपत्तमउअसुकुमाल कोमल तले अट्टसहस्सवरपुरिसलक्खणधरे (णगनगरमगरसागरचक्कंकरंमंगलंकियचलणे पा०)विसिट्ठरूवे हुयवहनिदधूमजलियतडितडियतरुणरविकिरणसरिसतेए अणासवे अममे अकिंचणे छिन्नसोए निरुवलेवे ववगयपेमरागदोसमोहे निग्गंथस्स पवयणस्स देसए सत्थनायगेपइठावए समणगविंदपरिअट्टए चउत्तीसबुद्धवयणातिसेसपत्ते पणतीससच्चवयणातिसेसपत्ते आगासगएणं चक्केणं आगासगएणं छत्तेणं आगासियाहिं चामराहिं आगासफालिआमएणं सपायवीढेणं सीहासणेणं धम्मज्झएणं पुरओ पकढिज्जमाणेणं चउट्टसहिं समणसाहस्सीहिं छत्तीसाए अज्जि- (१३९) आसाहस्सीहिं सद्धिं संपरिवुडे पव्वाणुपुव्विं चरमाणे गामाणुग्गामं दूइज्जमाणे सुहंसुहेणं विहरमाणे चंपाए णयरीए बहिया उवणगरग्गामं उवागए चंपं नगरिं पुण्णभद्वं चेइयं समोसरिउकामे ।१०। तए णं से पवित्तिवाउए इमीसे कहाए लद्धे समणे हट्टतुट्टचित्तमाणंदिए पीइमणे परमसोमणस्सिए हरिसवसविसप्पमाणहियए ण्हाए कयबलिकम्मे कयकोउअमंगलपायच्छित्ते सुद्धप्पावेसाइं मंगल्लाइं वत्थाइं पवरपरिहिए अप्पमहग्घाभरणालंकियसरीरे सआओ गिहाओ पडिणिक्खमइ ता चंपाए णयरीए मज्झमज्झेणं जेणेव कोणियस्स रण्णो गिहे जेणेव बाहिरिया उवट्टाणसाला जेणेव कूणिए राया भंभसारपुत्ते तेणेव उवागच्छइ ता करयलपरिग्गहियं सिरसावत्तं मत्थए अंजलिं कट्टु जएणं विजएणं वद्धावेइ ता एवं व०-जस्स णं देवाणुप्पिया दंसणं कंखंति जस्स णं देवाणुप्पिया दंसणं पीहंति जस्स णं देवाणुप्पिया दंसणं पत्थंति जस्स णं देवाणुप्पिया दंसणं अभिलसंति जस्स णं देवाणुप्पिया णामगोत्तस्सवि सवणयाए हट्टतुट्टजावहिअया भवंति से णं समणे भगवं महावीरे पुव्वाणुपुव्विं चरमाणे गामाणुग्गामं दूइज्जमाणे चंपाए णयरीए उवणगरग्गामं उवागए चंपं नगरिं पुण्णभद्वं चेइअं समोसरिउकामे तं एअं णं देवाणुप्पियाणं पिअट्टयाए पिअं णिवेदेमि पिअं भे भवउ ।११। तए णं से कूणिए राया भंभसारपुत्ते तस्स पवित्तिवाउअस्स अंतिए एयमट्टं सोच्चा णिसम्म हट्टतुट्टजावहियए विअसिअवरकमलणयणवयणे पअलिअवरकडगुडियकेयूरमउडकुंडले हारद्धहारविरायंतरइवच्छे पालंबपलंबमाणघोलंतभूसणधरे ससंभमं तुरियं चवलं नरिंदे सीहासणाउ अब्भुट्टेइ ता पायपीढाउ पच्चोरूहइ ता (वेरूलियवरिट्ठरिड्ठअंजणनिउणोवियमिसिमिसिंतमणिरयणमंडियाओ पा०) पाउआओ ओमुअइ ता अवहट्टु पंच रायककुहाइं तं०-खग्गं छत्तं उप्फेसं वाहणाओ वालवीअणं एक्कसाडियं उत्तरासंगं करेइ ता आयंते चोक्खे परमसुइभूए अंजलिमउलिअग्गहत्थे तित्थगराभिमुहे सत्तट्टपयाइं अणुगच्छति ता वामं जाणुं अंचेइत्ता दाहिणं जाणुं धरणितलंसि साहट्टु तिक्खुत्तो मुद्धाणं धरणितलंसि निवेसेइ ता ईसिं पच्चुण्णमति ता कडगुडियथंभिआओ भुआओ पडिसाहरति ता करयल जाव कट्टु एवं व०-णमोऽत्थु णं अरिहंताणं भगवंताणं आइगराणं तित्थगराणं सयंसंबुद्धाणं पुरिसुत्तमाणं पुरिससीहाणं पुरिसवरपुंडरीआणं पुरिसवरगंधहत्थीणं लोगुत्तमाणं लोगनाहाणं लोगहियाणं लोगपईवाणं लोगपज्जोतगराणं अभयदयाणं चक्खुदयाणं मग्गदयाणं सरणदयाणं जीवदयाणं बोहिदयाणं धम्मदयाणं धम्मदेसयाणं धम्मनायगाणं धम्मसारहीणं धम्मवरचाउरंतचक्कवट्टीणं दीवो ताणं सरणं गई पइट्ठा अप्पडिहयवरनाणदंसणधराणं विअट्टच्छउमाणं जिणाणं जावयाणं तिण्णाणं तारयाणं बुद्धाणं बोहयाणं मुत्ताणं मोअगाणं सव्वन्नूणं सव्वदरिसीणं सिवमयलमरूअमणंतमक्खयमव्वाबाहमपुणरावत्तिसिद्धिगइनामधेयं ठाणं संपत्ताणं, नमोऽत्थु णं समणस्स भगवओ महावीरस्स आदिगरसस्स तित्थगरस्स जाव संपाविउकामस्स मम धम्मायरियस्स धम्मोवेदेसगस्स, वंदामि णं भगवंतं तत्थ गयं इह गते पासउ मे (मं से) भगवं तत्थ गए इह गयन्तिकट्टु वंदति णमंसति ता सीहासणवरगए पुरत्थाभिमुहे निसीअइ ता तस्स पवित्तिवाउअस्स अट्टुत्तरसयसहस्सं पीतिदाणं दलयति ता सक्कारेति सम्माणेति ता एवं व०-जया णं देवाणुप्पिया ! समणे भगवं महावीरे इहमागच्छेज्जा इह समोसरिज्जा इहेव चंपाए णयरीए बहिया पुण्णभद्वे चेइए अहापडिरूवं उग्गहं उग्गिण्हित्ता संजमेणं तवसा अप्पाणं भावेमाणे

विहरेजा तथा णं मम एअमट्ठं निवेदिजासित्तिकट्टु विसज्जिते ।१२। तए णं समणे भगवं महावीरे कल्लं पाउप्पभायाए रयणीए फुलुप्पलकमलकोमलुम्मिलितंमि आहा (अह) पंडुरे पहाए रत्तासोगप्पगासकिंसु असुअमुहगुंजद्धरागसरिसे कमलागरसंडबोहए उट्ठियम्मि सूरे सहस्सरस्सिंमि दिणयरे तेयसा जलंते जेणेव चंपा णयरी जेणेव पुण्णभद्दे चेइए तेणेव उवागच्छति ता अहापडिरूवं उग्गहं उग्गिण्हित्ता संजमेणं तवसा अप्पाणं भावे माणे विहरति ।१३। तेणं कालेणं० समणस्स भगवओ महावीरस्स अंतेवासी बहवे समणा भगवंतो अप्पेगइया उग्गपव्वइया भोगपव्वइया राइण्ण० णाय० कोरव्व० खत्तिअपव्वइआ भडा जोहा सेणावई पसत्थारो सेट्ठी इब्भा अण्णे य बहवे एवमाइणो उत्तमजातिकुलरूवविणयविण्णाणवण्णलावण्णविक्रमपहाणसोभगगकंतिजुत्ता बहुधणधण्णणिचयपरियालफिडिआ णरवइगुणाइरेगा इच्छिअभोगा सुहसंपललिआ किंपागफलोवमं च मुणिअ विसयसोक्खं जलबुब्बुअसमाणं जोवण्णं कुसग्गजलबिंदुचंचलं जीवियं च णारुण अध्धुवमिणं-रयमिव पडग्गलग्गं संविधुणित्ताणं चइत्ता हिरण्णं जाव पव्वइआ अप्पेगइआ अब्बमासपरिआया अप्पेगइया मासपरिआया एवं दुमास० तिमास० जाव एक्कारस० अप्पेगइआ वासपरिआया दुवास० तिवास० अप्पेगइआ अणेगवासपरिआया संजमेणं तवसा अप्पाणं भावेमाणा विहरंति ।१४। तेणं कालेणं० समणस्स भगवओ महावीरस्स अंतेवासी बहवे निग्गंथा भगवंतो अप्पेगइआ आभिणिबोहियणाणी जाव केवलणाणी अप्पगइआ मणबलिआ वयबलिआ कायबलिआ (नाणबलिया दंसणबलिया चरित्तबलिया पा०) अप्पेगइआ मणेणं सावाणुग्गहसमत्था अप्पेगइआ खेलोसहिपत्ता एवं जल्लोसहि० विप्पोसहि० आमोसहि० सव्वोसहि० अप्पेगइआ कोट्टुबुद्धी एवं बीअबुद्धी पडबुद्धी अप्पेगइआ पयाणुसारी अप्पेगइआ संभिन्नसोआ अप्पेगइआ खीरासवा अप्पेगइआ महुआसवा अप्पेगइआ सप्पिआसवा अप्पेगइआ अक्खीणमहाणसिआ एवं उज्जुमती अप्पेगइआ विउलमई विउव्वणिडिठपत्ता चारणा विज्जाहरा आगासातिवाइणो अप्पेगइआ कणगावलिं तवोकम्मं पडिवण्णा एवं एक्कावलिं खुड्ढागसीहनिक्कीलियं तवोकम्मं पडिवण्णा अप्पेगइया महालयं सीहनिक्कीलियं तवोकम्मं पडिवण्णा भद्दपडिमं महाभद्दपडिमं सव्वतोभद्दपडिमं आयंबिलवद्धमाणं तवोकम्मं पडिवण्णा मासिअं भिक्खुपडिमं एवं दोमासिअं पडिमं तिमासिअं पडिमं जाव सत्तमासिअं भिक्खुपडिमं पडिवण्णा अप्पेगइया पढमं सत्तराइंदिअं भिक्खुपडिमं पडिवण्णा जाव तच्चं सत्तराइंदिअं भिक्खुपडिमं पडिवण्णा अहोराइंदिअं भिक्खुपडिमं पडिवण्णा इक्कराइंदिअं भिक्खुपडिमं पडिवण्णा सत्तसत्तमिअं भिक्खुपडिमं अट्ठमिअं भिक्खुपडिमं णवणवमिअं भिक्खुपडिमं दसदसमिअं भिक्खुपडिमं खुडिडयं मोअपडिमं पडिवण्णा महल्लियं मोअपडिमं पडिवण्णा जवमज्झं चंदपडिमं पडिवण्णा वइरमज्झं चंदपडिमं विवेगपडिमं विउस्सग्गपडिमं उवहाणपडिमं पडिसंलीणपडिमं पडिवण्णा संजमेणं तवसा अप्पाणं भावेमाणा विहरंति ।१५। तेणं कालेणं० समणस्स भगवओ महावीरस्स अंतेवासी बहवे थेरा भगवंतो जातिसंपण्णा कुलसंपण्णा बलसंपण्णा रूवसंपण्णा विणयसंपण्णा णाणसंपण्णा दंसणसंपण्णा चरित्तसंपण्णा लज्जासंपण्णा लाघवसंपण्णा ओअंसी तेअंसी वच्चंसी जसंसी जिअकोहा जियमाणा जिअमाया जिअलोभा जिअइंदिआ जिअणिद्दा जिअपरीसहा जीविआसमरणभयविप्पमुक्का वयप्पहाणा गुणप्पहाणा करणप्पहाणा चरणप्पहाणा णिग्गहप्पहाणा निच्छयप्पहाणा अज्जवप्पहाणा मद्दवप्पहाणा लाघवप्पहाणा खंतिप्पहाणा मुत्तिप्पहाणा विज्जापहाणा मंतप्पहाणा वेअप्पहाणा बंभप्पहाणा नयप्पहाणा नियमप्पहाणा सच्चप्पहाणा सोअप्पहाणा चारूवण्णा लज्जा (ज्जू) तवस्सी जिइंदिया सोही अणियाणा अप्पुस्सुआ अबहिल्लेसा अप्पडिलेस्सा सुसामण्णरया दंता (बहूणं आयरिया बहूणं उवज्झाया बहूणं दीवा ताणं सरणं गई पइट्ठा पा०) इणमेव णिग्गंथं पावयणं पुरओ काउं विहरंति, तेसिं णं भगवंताणं आयावाया (वाई पा०) वि विदिता भवंति परवाया (इणो पा०) विदिता भवंति आयावायं जमइत्ता नलवणमिव मत्तमातंगा अच्छिदपसिणवागरणा रयणकरंडगसमाणा कुत्तिआवणभूआ परवादियपमद्दणा दुवालसंगिणो (परवाईहिं अणोक्कंता अण्णउत्थिएहिं अणोद्धसिज्जमाणा अप्पेगइया आयावरधरा पा०) समत्तगणिपिडगधरा सव्वक्खरसण्णिवाइणो सव्वभासाणुगामिणो अजिणा जिणसंकासा जिणा इव अवितहं वागरमाणा संजमेणं तवसाअप्पाणं भावेमाणा विहरंति ।१६। तेणं कालेणं० समणस्स भगवओ महावीरस्स अंतेवासी बहवे अणगारा भगवंतो ईरिआसमिआ भासासमिआ एसणासमिआ आदाणभंडमत्तनिकखेवणासमिआ

उच्चारपासवणखेलसिंधाणजल्लपारिद्धावणियासमिआ मणगुत्ता वयगुत्ता कायगुत्ता गुत्ता गुत्तिंदिया गुत्तबंभयारी अममा अकिंचणा (छिण्णगंथा पा०) अगंथा छिण्णसोआ निरूवलेवा कंसपातीव मुक्कतोआ संखइव निरंगणा जीवोविव अप्पडिहयगती जच्चकणगंपिवजातरूवा आदरिसफलगाविव पागडभावा कुम्मोइव गुत्तिंदिआ पुक्खरपत्तंव निरूवलेवा गगणमिव निरालंबणा अणिलोइव निरालया चंदइव सोमलेसा सूरइव दित्ततेआ सागरोइव गंभीरा विहगइव सव्वओ विप्पमुक्का मंदरइव अप्पकंपा सारयसलिलंव सुद्धहिअया खग्गिविसाणंव एगजाया भारंडपक्खीव अप्पमत्ता कुंजरोइव सोंदिरा वसभोइव जायत्थामा सीहोइव दुद्धरिसा वसुंधराइव सव्वफासविसहा सुहुअहुआसणेइव तेअसा जलंता, नत्थि णं तेसिं णं भगवंताणं कत्थई पडिबंधे भवइ, से अ पडिबंधे चउव्विहे पं० तं०-दव्वओ खित्तओ कालओ भावओ, दव्वओ णं सचित्ताचित्तमीसिएसु दव्वेसु (तं०-अंडएइ वा पोयएइ वा उग्गहिएइ वा वग्गहिए वा जणं जणं दिसं इच्छंति तंणं तंणं दिसं सूइभूया लघुभूया अणप्पगंथा विहरन्ति पा०) खेत्तओ गामे णयरे वा रण्णे वा खेत्ते वा खले वा घरे वा अंगणे वा कालओ समए वा आवलियाए वा जाव अयणे वा अण्णतरे वा दीहकालसंजोगे भावओ कोहे वा माणे वा मायाए वा लोहे वा भए वा हासे वा० एवं तेसिं ण भवइ, ते णं भगवंतो वासावासवज्जं अट्ठ गिम्हहेमंतिआणि मासाणि गामे एगराइआ णयरे पंचराइआ वासीचंदणसमाणकप्पा समलेट्ठुकंचणा समसुहदुक्खा इहलोगपरलोगअप्पडिबद्धा संसारपारगामी कम्मणिग्घायणद्वाए अब्भुट्ठिआ विहरंति । १७। तेसिं णं भगवंताणं एतेणं विहारेणं विहरमाणाणं इमे एआरूवे (जायामायावित्ती अदुत्तरं च णं पा०) अब्भिंतरबाहिए तवोवहाणे होत्था तं०-अब्भिंतरए छव्विहे बाहिएवि छव्विहे । १८। से किं तं बाहिए ?, २ छव्विहे पं० तं०-अणसणे ऊणो (अवमो) अरिया भिक्खाअरिया रसपरिच्चाए कायकिलेसे पडिसंलीणया, से किं तं अणसणे ?, २ दुविहे पं० तं०-इत्तरिए अ आवकहिए अ. से किं तं इत्तरिए ?, २ अणेगविहे पं० तं०-चउत्थभत्ते छट्ठभत्ते अट्ठभत्ते दसमभत्ते बारसभत्ते चउद्दसभत्ते सोलसभत्ते अब्भमासिए भत्ते मासिए भत्ते दोमासिए भत्ते तेमासिए भत्ते चउमासिए भत्ते पंचमासिए भत्ते छम्मासिए भत्ते, से तं इत्तरिए, से किं तं आवकहिए ?, २ दुविहे पं० तं०-पाओवगमणे अ भत्तपच्चक्खाणे अ, से किं तं पाओवगमणे ?, २ दुविहे पं० तं०-वाघाइमे अ निव्वाघाइमे अ नियमा अप्पडिकम्मे, से तं पाओवगमणे, से किं तं भत्तपच्चक्खाणे ?, २ दुविहे पं० तं०-वाघाइमे अ निव्वाघाइमे अणियमा सप्पडिकम्मे, से तं भत्तपच्चक्खाणे, से तं अणसणे, से किं तं ओमोअरिआ ?, २ दुविहा पं० तं०-दव्वोमोअरिआ य भावोमोअरिआ य, से किं तं दव्वोमोअरिआ ?, २दुविहा पं० तं०-उवगरणदव्वोमोअरिआ य भत्तपाणदव्वोमोअरिआ य, से किं तं उवगरणदव्वोमोअरिआ ?, २ तिविहा पं० तं० एगे वत्थे -एगे पाए चियत्तोवकरणसातिज्जणया, से तं उवगरणदव्वोमोअरिआ, से किं तं भत्तपाणदव्वोमोअरिआ ?, २ अणेगविहा पं० तं०-अट्ठकुक्कुडिअंडगप्पमाणमेत्ते कवले आहारमाणे अप्पाहारे दुवालसकुक्कुडिअंडगप्पमाणमेत्ते कवले आहारमाणे अवइढोमोअरिआ सोलसकुक्कुडिअंडगप्पमाणमेत्ते कवले आहारमाणे दुभागपत्तोमोअरिआ चउव्वीसकुक्कुडिअंडगप्पमाणमेत्ते कवले आहारमाणे पत्तोमोअरिआ एकतीसकुक्कुडिअंडगप्पमाणमेत्ते कवले आहारमाणे किंचूणोमोअरिआ बत्तीसकुक्कुडिअंडगप्पमाणमेत्ते कवले आहारमाणे पमाणपत्ता, एत्तो एगेणविघासेण ऊणयं आहारमाहारेमाणे समणे णिग्गंथे णो पकामरसभोईत्ति वत्तव्वं सिआ, से तं भत्तपाणदव्वोमोअरिआ, से तं दव्वोमोअरिआ, से किं तं भावोमोअरिआ ?, २ अणेगविहा पं० तं०-अप्पकोहे अप्पमाणे अप्पमाए अप्पलोहे अप्पसद्दे अप्पझंझे, से तं भावोमोअरिआ, से तं ओमोअरिआ, से किं तं भिक्खायरिया ?, अणेगविहा पं० तं०-दव्वाभिग्गहचरए खेत्ताभिग्गहचरए कालाभिग्गहचरए भावाभिग्गहचरए उक्खित्तचरए णिक्खित्तचरए उक्खित्तणिक्खित्तचरए णिक्खित्तउक्खित्तचरए वट्ठिज्जमाणुचरए साहरिज्जमाणचरए उवणीअचरए अवणीअचरए उवणीअअवणीअचरए अवणीअउवणीअचरए संसट्ठचरए असंसट्ठचरए तज्जातसंसट्ठचरए अण्णायचरए मोणचरए दिट्ठलाभिए अदिट्ठलाभिए पुट्ठलाभिए अपुट्ठलाभिए भिक्खालाभिए अभिक्खलाभिए अण्णगिलायए ओवणिहिए परिमितपिंडवाइए सुद्धेसणिए संखादत्तिए, से तं भिक्खायरिया. से किं तं रसपरिच्चाए ?, २ अणेगविहे पं० तं०-णिव्वि-(य) तिए पणीअरसपरिच्चाए आयंबिलए आयामसित्थभोई अरसाहारे विरसाहारे अंताहारे पंताहारे लूहा (तुच्छा पा०) हारे से तं रसपरिच्चाए, से किं तं कायकिलेसे ?. २ अणेगविहे पं० तं०-ठाणट्ठितीए

(ठाणाइए पा०) उक्कुडुआसणिए पडिमट्टाई वीरासणिए नेसज्जिए दंडायए लउडसाई (लगंडसाई पा०) आयावए अवाउडए अकंडूअए अणिठूहए (धुयकेसमंसुलोमा पा०) सव्वगायपरिकम्मविभूसविप्पमुक्के. से तं कायकिलेसे. से किं तं पडिसंलीणया ? २ चउव्विहा पं० तं०-इंदिएअपडिसंलीणया कसायपडिसंलीणया जोगपडिसंलीणया विवित्तसयणासणसेवणया, से किं तं इंदियपडिसंलीणया ?, २ पंचविहा पं० तं०-सोइंदियविसयपयारनिरोहो वा सोइंदियविसयपत्तेसु अत्थेसु रागदोसनिग्गहो वा चक्खिंदिय० विसयपयारनिरोहो वा चक्खिंदियविसयपत्तेसु अत्थेसु रागदोसनिग्गहो वा घाणिंदियविसयपयारनिरोहो वा घाणिंदियविसयपत्तेसु अत्थेसु रागदोसनिग्गहो वा जिब्भिंदियविसयपयारनिरोहो वा जिब्भिंदियविसयपत्तेसु अत्थेसु रागदोसनिग्गहो वा फासिंदियविसयपयारनिरोहो वा फासिंदियविसयपत्तेसु अत्थेसु रागदोसनिग्गहो वा, से तं इंदियपडिसंलीणया, से किं तं कसायपडिसंलीणया ?, २ चउव्विहा पं० तं०-कोहस्सुदयनिरोहो वा उदयपत्तस्स वा कोहस्स विफलीकरणं माणस्सुदयनिरोहो वा उदयपत्तस्स माणस्स विफलीकरणं मायाउदयणिरोहो वा उदयपत्ताए वा मायाए विफलीकरणं लोहस्सुदयणिरोहो वा उदयपत्तस्स वा लोहस्स विफलीकरणं, से तं कसायपडिसंलीणया, से किं तं जोगपडिसंलीणया ?, २ तिविहा पं० तं०-मणजोगपडिसंलीणया वयजोगपडिसंलीणया कायजोगपडिसंलीणया, से किं तं मणजोगपडिसंलीणया ?, २ अकुसलमणणिरोहो वा कुसलमणउदीरणं वा, से तं मणजोगपडिसंलीणया, से किं तं वयजोगपडिसंलीणया ?, २ अकुसलवयणिरोहो वा कुसलवयउदीरणं वा, से तं वयजोगपडिसंलीणया, से किं तं कायजोगपडिसंलीणया ?, २ जण्णं सुसमाहिअपाणिपाए कुम्मोइव गुत्तिंदिए सव्वगायपडिसंलीणे चिट्ठइ, से तं कायजोगपडिसंलीणया, से किं तं विवित्तसयणासणसेवणया ?, २ जं णं आरामेसु उज्जाणेसु देवकुलेसु सभासु पवासु परियगिहेसु पणिअसालासु इत्थीपसुपंडगसंसत्तिविरहियासु वसहीसु फासुएसणिज्जपीढफलगसेज्जासंथारं उवसंपज्जित्ताणं विहरइ, से तं पडिसंलीणया, से तं बाहिरए तवे । १९। से किं तं अब्भित्तरए तवे ?, २ छव्विहे पं० तं०-पायच्छित्तं विणओ वेयावच्चं सज्झाओ झाणं विउस्सग्गो, से किं तं पायच्छित्ते ?, २ दसविहे पं० तं०-आलोअणारिहे पडिक्कमणारिहे तदुभयारिहे विवेगारिहे विउस्सग्गारिहे तवारिहे छेदारिहे मूलारिहे अणवट्ठप्पारिहे पारंचिआरिहे, से तं पायच्छित्ते, से किं तं विणए ?, २ सत्तविहे पं० तं०-णाणविणए दंसणविणए चरित्तविणए मणविणए वइविणए कायविणए लोगोवयारविणए, से किं तं णाणविणए ?, २ पंचविहे पं० तं०-आभिणिबोहियणाणविणए सुअ० ओहि० मणपज्जव० केवल०, से किं तं दंसणविणए ?, २ दुविहे पं० तं०-सुस्सूसणाविणए अणच्चासायणाविणए, से किं तं सुस्सूसणाविणए ?, २ अणेगविहे पं० तं०-अब्भुट्ठाणेइ वा आसणाभिग्गहेइ वा आसणाप्पदाणेइ वा सक्कारेइ वा सम्माणेइ वा किइक्कमेइ वा अंजलिपग्गहेइवा एतस्स अणुगच्छणया ठिअस्स पज्जुवासणया गच्छंतस्स पडिसंसाहणया, से तं सुस्सूसणाविणए, से किं तं अणच्चासायणाविणए ?, २ पणतालीसविहे पं० तं०-अरहंताणं अणच्चासायणया अरहंतपणत्तस्स धम्मस्स अण० आयरियाणं अण० एवं उवज्झायाणं थेराणं कुलस्स गणस्स संघस्स किरिआणं संभोगिअस्स ओभिणिबोहियणाणस्स सुअणाणस्स ओहिणाणस्स मणपज्जवणाणस्स केवलणाणस्स० एसिं चेव भत्तिबहुमाणे एसिं चेव वण्णसंजलणया, से तं अणच्चासायणाविणए, से किं तं चरित्तविणए ?, २ पंचविहे पं० तं०-सामाइअचरित्तविणए छेओवट्ठावणिअ० परिहारविसुद्ध० सुहुमसंपराय० अहक्खायचरित्तविणए, से तं चरित्तविणए, से किं तं मणविणए ?, २ दुविहे पं० तं०-पसत्थमणविणए अपसत्थमणविणए, से किं तं अपसत्थमणविणए ?, २ जे अ मणे सावज्जे सकिरिए सकक्कसे कडुए णिट्ठुरे फरूसे अण्हयकरे छेयकरे भेयकरे परितावणकरे उद्वणकरे भूओवघाइए तहप्पगारं मणो णो पहारेज्जा, से तं अपसत्थमणोविणए, से किं तं पसत्थमणोविणए ?, २ तं चेव पसत्थं णेयव्वं, एवं चेव वइविणओऽवि एएहिं पएहिं चेव णेअव्वो, से तं वइविणए, से किं तं कायविणए ?, २ दुविहे पं० तं०-पसत्थकायविणए य अपसत्थकायविणए य, से किं तं अपसत्थकायविणए ?, २ सत्तविहे पं० तं०-अणाउत्तं गमणे अण्णाउत्तं ठाणे अणाउत्तं ठाणे अणाउत्तं निसीदणे अणाउत्तं तुअट्ठणे अणाउत्तं उल्लंघणे अणाउत्तं पलंघणे अणाउत्तं सव्विदियकायजोगजुंजणया, से तं अपसत्थकायविणए, से किं तं पसत्थाकायविणए ?, २ एयं (तं) चेव पसत्थं भाणियव्वं, से तं पसत्थकायविणए, से तं कायविणए, से किं तं लोगोवयारविणए ?, २ सत्तविहे पं० तं०-अब्भासवत्तियं

परच्छंदाणुवत्तियं कज्जहेउं कयपडिकिरिया अत्तगवेसणया देसकालण्णया सव्वट्टेसु अपडिलोमया, से तं लोगोवयारविणए, से तं विणए, से किं तं वेआवच्चे ?, २ दसविहे पं० तं०-आयरियवेआवच्चे उवज्झाय० सेह० गिलाण० तवस्सि० थेर० साहम्मिअ० कुल० गण० संघवेआवच्चे, से तं वेआवच्चे, से किं तं सज्झाए ?, २ पंचविहे पं० तं०-वयणा पडिपुच्छणा परिअट्टणा अणुप्पेहा धम्मकहा, से तं सज्झाए, से किं तं ज्ञाणे ?, २ चउव्विहे पं० तं०-अट्टज्झाणे रूद्धज्झाणे धम्मज्झाणे सुक्कज्झाणे, अट्टज्झाणे चउव्विहे पं० तं०-अमणुण्णसंपओगसंपउत्ते तस्स विप्पओगसतिसमण्णागए यावि भवइ, मणुण्णसंपओगसंपउत्ते तस्स अविप्पओगस्सतिसमण्णागए आवि भवइ, आयंकसंपओगसंपउत्ते तस्स विप्पओगसतिसमण्णागए आवि भवइ, परिजुसियकामभोगसंपओगसंपउत्ते तस्स अविप्पओगसतिसमण्णागए आवि भवइ, अट्टस्स णं ज्ञाणस्स चत्तारि लक्खणा पं० तं०-कंदणया सोअणया तिप्पणया विलवणया, रूद्धज्झाणे चउव्विहे पं० तं०-हिंसाणुबंधी मोसाणुबंधी तेणाणुबंधी सारक्खणाणुबंधी, रूद्धस्स णं ज्ञाणस्स चत्तारि लक्खणा पं० तं०-उस्सण्णदोसे बहुदोसे अण्णाणदोसे आमरणंतदोसे, धम्मज्झाणे चउविहे चउप्पडोयारे पं० तं०-आणाविजए अवायविजए विवागविजए संठाणविजए, धम्मस्स णं ज्ञाणस्स चत्तारि लक्खणा पं० तं०-आणारूई णिसगारूई उवएसरूई सुत्तरूई धम्मस्स णं ज्ञाणस्स चत्तारि आलंबणा पं० तं०-वायणा पुच्छणा परियट्टणा धम्मकहा, धम्मस्स णं ज्ञाणस्स चत्तारि अणुप्पेहाओ पं० तं०-अणिच्चाणुप्पेहा असरणणुप्पेहा एगत्ताणुप्पेहा संसारणुप्पेहा, सुक्कज्झाणे चउव्विहे चउप्पडोआरे पं० तं०-पुहत्तवियक्के सविआरी एगत्तवियक्के अविआरी सुहुमकिरिए अप्पडिवाई समुच्छिन्नकिरिए अणियट्ठी, सुक्कस्स णं ज्ञाणस्स चत्तारि लक्खणा पं० तं०-विवेगे विउस्सग्गे अव्वहे असम्मोहे, सुक्कस्स णं ज्ञाणस्स चत्तारि आलंबणा पं० तं०-खंती मुत्ती अज्जवे मद्दवे, सुक्कस्स णं ज्ञाणस्स चत्तारि अणुप्पेहाओ पं० तं०-अवायाणुप्पेहा असुभाणुप्पेहा अणंतवत्तिआणुप्पेहा विप्परिणामाणुप्पेहा, से तं ज्ञाणे, से किं तं विउस्सग्गे ?, २ दुविहे पं० तं०-दव्वविउस्सग्गे य भावविउस्सग्गे अ, से किं तं दव्वविउस्सग्गे ?, २ चउव्विहे पं० तं०-सरीरविउस्सग्गे गणविउस्सग्गे उव्हिविउस्सग्गे भत्तपाणविउस्सग्गे, से तं दव्वविउस्सग्गे, से किं तं भावविउस्सग्गे ?, २ तिविहे पं० तं०-कसायविउस्सग्गे संसारविउस्सग्गे कम्मविउस्सग्गे, से किं तं कसायविउस्सग्गे ?, २ चउव्विहे पं० तं०-कोहकसायविउस्सग्गे माण० माया० लोह०, से तं कसायविउस्सग्गे, से किं तं संसारविउस्सग्गे ?, चउव्विहे पं० तं०-णेरइअसंसारविउस्सग्गे तिरिय० मणु० देव०, से तं संसारविउस्सग्गे, से किं तं कम्मविउस्सग्गे ?, २ अट्टविहे पं० तं०-णाणावरणिज्जकम्मविउस्सग्गे दरिसणावरणिज्ज० वेअणीअ० मोहणीय० आऊअ० णाम० गोअक० अंतरायकम्मविउस्सग्गे, से तं कम्मविउस्सग्गे, से तं भावविउस्सग्गे, ॥२०॥ तेणं कालेणं० समणस्स भगवओ महावीरस्स बहवे अणगारा भगवंतो अप्पेगइआ आयारधरा जाव विवागसुअधरा (तत्थ तत्थ तहिं तहिं देसे देसे गच्छागच्छिं गुम्मागुम्मिं फड्डाफडिंड पा०) अप्पेगइआ वायंति अप्पेगइया पडिपुच्छंति अप्पेगइया परियट्ठंति अप्पेगइया अणुप्पेहंति अप्पेगइआ अक्खेवणीओ विक्खेवणीओ संवेअणी ओ णिव्वेअणी ओ चउव्विहा ओ कहा ओ कहंति अप्पगइया उड्डंजाणू अहोसिरा ज्ञाणकोट्टोव गया संजमेणं तवसा अप्पाणं भावेमाणा विहरंति संसार भउव्विग्गा भीआ जम्मणजरमरणकरण गंभीर दुक्खपक्खु भिअपउर सलिलं संजोग विओगवीचीचिंतापसंगपसरि अवहबंधमहल्लविउल कल्लोल कलुण विलवि अलोभकलकलंतबोलबहुलं अवमाणणफेण तिक्खिंसण पुलंपुलप्पभू अरोगवे अरपरिभवविणिवायफरूसध रिसणासमावडि अकढिणकम्मपत्थरत रंगरंगंतनिच्च मच्चुभयतो अपट्ठं कसाय पायाल ससंकुलं भवसयसहस्सकलुस जलसंचयं पतिभयं अपरिमिअमहिच्छकलुसमतिवाउवेगउद्धुम्ममाणदगरयरयंघआरवरफेणपउरआसापिवास धवलं मोहमहावत्तभोगभममाणगुप्पमाणुच्छलंत-पच्चोणियत्तपाणियपमायचंड बहुदुट्ठसावयसमाहउ दब्बायमाणपब्भार घोरकंदियमहारवर वंतभे रवरवं अण्णाणभमंतमच्छपरिहत्थअणिहुतिंदियमहामगरतुरिअचरि अखोखुब्भमाणनच्चंतचवल चंचलचलंतधुम्मंतजलसमूहं अरतिभयविसायसोग मिच्छत्तसेलसंकडं अणाइसंताण कम्मबंधणकिलेस चिक्खिल्लसुदुत्तारं अमरनरतिरियनिरयगइगमणकुडिलपरिवत्तविउलवेलं चउरंतमहंतमणवदग्गं रूद्धं संसारसागरं भीमदरिसणिज्जं तरंति धिइधणिअनिप्पकंपेण तुरियचवलं

संवरवेरगतुंगकूवयसुसंपउत्तेणं णाणसितविमलमूसिएणं सम्मत्तविसुद्धलद्धणिज्जाएणं धीरा संजमपोएण सीलकलिआ पसत्थज्झाणतववायपणोल्लिअपहाविएणं उज्जमववसायगगहियणिज्जरणजयणउवओगणाणदंसणविसुद्धवय (प्र० २) भंडभरिअसारा जिणवरववयणोवदिट्ठमग्गेणं अकुडिलेणं सिद्धिमहपट्टणाभिमुहा समणवरसत्थवाहा सुसुइसुसंभाससुपणहसासा, गामे एगरायं णगरे पंचरायं दूइज्जन्ता जिइंदिया णिब्भया गयभया सचित्ताचित्तमीसिएसु दव्वेसु विरागयं गया संजया विरया मुत्ता लहुआ णिरवकंखा साहु णिहुआ चरंति धम्मं ।२१। तेणं कालेणं० समणस्स भगवओ महावीरस्स बहवे असुरकुमारा देवा अंतिअं पाउब्भवित्था कालमहाणीलसरिसणीलगुलिअगवलअयसिकु सुमपगासा विअसिअसयवत्तमिवपत्तनिम्मलई सिंसितरत्ततंबणयणा गरूलायतउज्जुतुंगणासा उवचि असिलप्पवालबिंबफ लसण्णिभाहरोट्टा पंडुरससिसकल विमलणिम्मलसंखगोक्खी रफेणदगरयमुणालिया धवलदंतसेढी हुयवहणि ब्रंत धोयतत्ततवणिज्जरत्ततलतालुजीहा अंजणघणफसिणरूय गरमणिज्जणिद्धकेसा वामेगकुंडलधरा अद्वचंदणाणुलित्तगत्ता ईसिंसिलिंधपुप्फप्पगासाइं सुहुमाइं असंकिलिट्ठाइं वत्थाइं पवरपरिहिया वयं च पढमं समतिकंता बितिअं च वयं असंपत्ता भदे जोव्वणे वट्टमाणा तलभंगयतुडिअपरभूसणनिम्मलमणिरयणमंडिअभुआ दसमुदामंडिअगहत्था चूला मणिचिंधगया सुरूवा महिडिढआ महज्जुतिआ महबला महायसा महासोक्खा महाणुभागा हारविराइटवच्छा कडगतुडिअथंभिअभुआ अंगयकुंडलमट्टगंडतलकण्णपीढधारी विचित्तवत्थाभरणा विचित्तमालामउलिमउडा कल्लाणकयपवरवत्थपरिहिया कल्लाणकयपवरमल्लाणुलेवणा भासुरबोंदी पलंबवणमालधरा दिव्वेणं वण्णेणं दिव्वेणं गंधेणं दिव्वेणं रूवेणं दिव्वेणं फासेणं दिव्वेणं संघाए (घयणे) णं दिव्वेणं संठाणेणं दिव्वाए इड्डीए दिव्वाए जुत्तीए दिव्वाए पभाए दिव्वाए छायाए दिव्वाए अच्चीए दिव्वेणं तेएणं दिव्वाए लेसाए दस दिसाओ उज्जोवेमाणा पभासेमाणा समणस्स भगवओ महावीरस्स अंतिअं आगम्मागम्म समणं भगवं महावीरं तिक्खुत्तो आयाहिणं पयाहिणं करेन्ति ता वंदंति णमंसंति ता णच्चासणे णाइदूरे सुस्सूसमाणा णमंसमाणा अभिमुहा विणएणं पंजलिउडा पज्जुवासंति ।२२। तेणं कालेणं० समणस्स भगवओ महावीरस्स बहवे असुरिंदवज्जिआ भवणवासी देवा अंतिअं पाउब्भवित्था णागपइणो सुवण्णा विज्जू अग्गीआ दीवा उदही दिसाकुमारा य पवणा थणिआ य भवणवासी णागफडागरूलवयरपुण्णकलस (संकिण्णउप्फेस० पा०) सीहहयगयमगरमउडवद्धमाण- णिजुत्तविचित्तचिंधगया सुरूवा महिडिढया सेसं तं चेव जाव पज्जुवासंति ।२३। तेणं कालेणं० समणस्स भगवओ महावीरस्स बहवे वाणमंतरा देवा अंतिअं पाउब्भवित्था पिसाया भूआ य जक्खरक्खसकिंनरकिंपुरिसभुअगवइणो अ महाकाया गंधव्वणिकाय (प्र० पइ) गणा णिउणगंधव्वगीतरइणो अणपण्णिअपणपण्णिअइसिवादीअभूअवादीअकंदियमहाकंदिआ य कुहंड पयए य देवा चंचलचवलचित्तकीलणदवप्पिआ गंभीरहसिअभणीअपीअगीअणच्चणरई वणमालामेलमउडकुंडलसच्छंदविउव्विआहारणचारुविभूसणधरा सव्वोउयसुरभिकुसुमसुरइयपलंबसोभंतकंतविअसंतचित्तवणमालरइअवच्छा कामगमी कामरूवधारी णाणाविहवण्णरागवरवत्थचित्तचिल्लियणीयंसणा विविहदेसीणेवत्थगहिअवेसा पमुइअकंदप्पकलकेलिकोलाहलप्पिआ हासबोलकेलिबहुला अणेगमणिरयणविविहणिजुत्तविचित्तचिंधगया सुरूवा महिडिढआ जाव पज्जुवासंति ।२४। तेणं कालेणं० समणस्स भगवओ महावीरस्स जोइसिया देवा अंतिअं पाउब्भवित्था विहस्सतिचंदसूरसुक्कसणिच्चरा राहू धूमकेतू बुहा य अंगारका य तत्ततवणिज्जकणगवण्णा जे गहा जोइसंमि चारं चरंति केऊ अ गइरइआ अट्टावीसविहा य णक्खत्तदेवगणा णाणासंठाणसंठियाओ पंचवण्णाओ ताराओ ठिअलेस्स चारिणो अ अविस्साममंडलगती पत्तेयं णामंकपागडियचिंधमउडा महिडिढया जाव पज्जुवासंति ।२५। तेणं कालेणं० समणस्स भगवओ महावीरस्स वेमाणिया (सामाणियता- यत्तीससहिया सलोगपालअग्गमहिसिपरिसाणिअअप्परक्खेहिं संपरिवुडा देवसहस्साणुजाया मग्गेहिं पयएहिं समणुगम्मंतसस्सिरीया देवसंघजयसद्वकयालोया तरुणदिवागरकरातिरेगप्पहेहिं मणिकणगरयणघडियजालुज्जलहेमजा- लपेरंतपणिएहिं सपयरवरमुत्तदामलंबंतभूसणेहिं पचलियघंटावलिमहुरसद्वंसतीनतालगीयवाइयरवेणं हट्टतुट्टमणसा सेसावि य कप्पवरविमाणाहिवा० इत्यादि पा०) देवा अंतिअं पाउब्भवित्था सोहम्मीसाणसणंकुमारमाहिंद- बंभलंतकमहासुक्कसहस्साराणपपाणयारणअच्चुयवई पट्टिआ देवा जिणदंसणुस्सुगागमणजणियहासा

पालकपुप्फकसोमणससिरिवच्छणंदिआवत्तकामगमपीइगममणोगमविमलसव्वओभद्दणामधिज्जेहिं विमाणेहिं ओइण्णा वंदका जिणिंदं मिगमहिसवराहछगलददुदुरहयगयवइभुअगखग्गिउसभंकविडिमपागडियचिंधमउडा पसिढिलवरमउडतिरीडधारी कुंडलउज्जोविआणणा मउडदित्तसिरया रत्ताभा पउमपम्हगोरा सेया सुभवण्णगंधफासा उत्तमविउव्विणो विविहवत्थगंधमल्लधरा महिडिढआ महज्जुतिआ जाव पंजलिउडा पज्जुवासंति । २६ । तए णं चंपाए नयरीए सिंधाडगतिगचउक्कचच्चरचउम्मुहमहापहपहेसु महया जणसद्देइ वा जणवूहेइ वा (जणवाएइ वा जणुल्लावेइ वा पा०) जणबोलेइ वा जणकलकलेइ वा जणुम्मीति वा जणुक्कलियाइ वा जणसन्निवाएइ वा बहुजणो अण्णमण्णस्स एवमाइक्खइ एवं भासइ एवं पण्णवेइ एवं परूवेइ- एवं खलु देवाणुप्पिया ! समणे भगवं महावीरे आदिगरे तित्थगरे सयंसंबुद्धे पुरिसुत्तमे जाव संपाविउकामे पुव्वाणुपुव्विं चरमाणे गामाणुगामं दूइज्जमाणे इहमागए इह संपत्ते इह समोसढे इहेव चंपाए णयरीए बाहिं पुण्णभद्दे चेइए अहापडिरूवं उग्गहं उग्गिण्हित्ता संजमेणं तवसा अप्पाणं भावेमाणे विहरइ, तं महप्फलं खलु भो देवाणुप्पिया ! तहारूवाणं अरहंताणं भगवंताणं णामगोअस्सवि सवणताए, किमंग पुण अभिगमणवंदणणमंसणपडिपुच्छणपज्जुवासणयाए ?, एक्कस्सवि आयरियस्स धम्मिअस्स सुवयणस्स सवणताए ? (१४०) किमंग पुण विउलस्स अत्थस्स गहणयाए ?, तं गच्छामो णं देवाणुप्पिया ! समणं भगवं महावीरं वंदामो णमंसामो सक्कारेमो सम्माणेमो कल्लाणं मंगलं देवयं चेइअं विणएणं पज्जुवासामो, एतं णे पेच्चभवे (इहभवे य पा०)हियाए सुहाए खमाए निस्सेअसाए आणुगामिअत्ताए भविस्सइत्तिकट्ठु बहवे उग्गा उग्गपुत्ता भोगा भोगपुत्ता एवं दुपडोआरेणं राइण्णा (इक्खागा नाया कोरव्वा पा०) खत्तिआ माहणा भडा जोहा पसत्थारो मल्लई लेच्छई लेच्छइपुत्ता अण्णे य बहवे राईसरतलवरमाडंबियकोडुंबिअइब्भसेट्ठिसेणावइसत्थवाहपभित्तओ अप्पेगइआ वंदणवत्तिअं अप्पेगइआ पूअणवत्तिअं एवं सक्कारवत्तियं सम्माणवत्तियं दंसणवत्तियं कोऊहलवत्तियं अप्पेगइआ अट्ठविणिच्छयहेउं अस्सुयाइं सुणेस्सामो सुयाइं निस्संकियाइं करिस्सामो अप्पेगइआ अट्ठाइं हेऊइं कारणाइं वागरणाइं पुच्छिस्सामो अप्पेगइआ सव्वओ समंता मुंडे भवित्ता अगाराओ अणगारिअं पव्वइस्सामो अप्पे० पंचाणुवइयं सत्तसिक्खावइयं दुवालसविहं गिहिधम्मं पडिवज्जिस्सामो अप्पेगइआ जिणभत्तिरागेणं अप्पेगइआ जीअमेअंतिकट्ठु ण्हाया कयबलिकम्मा कयकोऊयमंगलपायच्छित्ता (पाउच्छोलणधोया पा०) सिरसाकंठेमालकडा आविद्धमणिसुवण्णा कप्पियहारऽद्धहारतिसरयपालंबपलंबपलंबमाणकडिसुत्तयसुकयसोहाभरणा पवरवत्थपरिहिया चंदणोलित्तगायसरीरा अप्पेगइआ हयगया एवं गयगया(जाणजुग्गजंपाणगिल्लिथिल्लि० पा०)सिबियागया संदमाणियागया अप्पेगइआ पायविहारचारिणो पुरिसवग्गुरापरिक्खित्ता(वग्गावग्गिं गुम्मागुम्मिं पाह)महया उक्किट्ठिसीहणायबोलकलरवेणं पक्खुब्भिअमहासमुद्धरवमूतंपिव करेमाणा (पायदद्वरेणं भूमिं कंपेमाणा अंबरतलमिव फोडेमाणा एगदिसिं एगाभिमुहा पा०) चंपाए णयरीए मज्झमज्झेणं णिग्गच्छंति ता जेणेव पुण्णभद्दे चेइए तेणेव उवागच्छंति ता समणस्स भगवओ महावीरस्स अदूरसामंते छत्ताईए तित्थयराइसेसे पासंति ता जाणवाहणाइं ठावइंति(विट्ठुभंति पाह) ता जाणवाहणेहिंतो पच्चोरुहंति ता जेणेव समणे भगवं महावीरे तेणेव उवागच्छंति ता समणं भगवं महावीरं तिक्खुत्तो आयाहिणं पयाहिणं करंति ता वंदंति णमंसंति ता णच्चासण्णे णाइदूरे सुस्सूसमाणा णमंसमाणा अभिमुहा विणएणं पंजलिउडा पज्जुवासंति (जाणाइं मुयंति वाहणाइं विसज्जेति पुप्फतंबोलाइयं आउहमाइयं सच्चित्तालंकारं पाहणाओ य, एगसाडियं उत्तरासंगं, आयंता चोक्खा परमसुईभूया अभिगमेणं अभिगच्छंति, चक्खुप्फासे०, मणसा एगत्तिभावकरणेणं, सुसमाहिपसंतसाहरियपाणिपाया अंजलिमउलियहत्था, एवमेयं भंते ! अवितहमेयं असंदिद्धमेयं इच्छियमेयं पडिच्छियमेयं इच्छियपडिच्छियमेयं सच्चे णं एसमट्ठे, माणसियाए तच्चित्ता तम्मणा तल्लेस्सा तयज्झवसिया तत्तिव्वज्झवसाणा तदप्पियकरणा तयट्ठोवउत्ता तब्भावणाभाविया एगमणा अणन्नमणा जिणवयणधम्मणुरागरत्तमणा वियसियवरकमलनयणवयणा, समोसरणाइं गवेसह आगंतारेसु वा आरामागारेसु वा आएसणेसु वा आवसहेसु वा पणियगेहेसु वा पणियसालासु वा जाणगिहेसु जाणसालासु कोट्टागारेसु सुयाणेसु सुन्नागारेसु परिहिंडमाणे परिघोलेमाणे पा०) । २७ । तए णं से पवित्तिवाउए इमीसे कहाए लद्धे समणे हट्ठुतुट्ठे जाव हियए ण्हाए जाव अप्पमहग्घाभरणांकिअसरीरे सयाओ गिहाओ पडिणिक्खमइ सयाओ गिहाओ पडिणिक्खमइत्ता

चंपाणयरिं मज्झिमज्झेणं जेणेव बाहिरिया सव्वेव हेट्ठिल्ला वत्तव्वया जाव णिसीइ ता तस्स पवित्तिवाउअस्स अद्धत्तेरससयसहस्साइं पीइदाणं दलयति ता सक्कारेइ सम्माणेइ ता पडिविसज्जेइ । २८ । तए णं से कूणिए राया भंभसारपुत्ते बलवाउअं आमंतेइ ता एवं व०- खिप्पामेव भो देवाणुप्पिया ! आभिसेक्कं हत्थिरयणं पडिकप्पेहि, हयगयरहपवरजोहकलियं च चाउरंगिणिं सेणं सण्णाहेहि, सुभद्दापमुहाणं य देवीणं बाहिरियाए उवट्ठाणसालाए पाडिएक्कपाडिएक्काइं जत्ताभिमुहाइं जुत्ताइं (जुग्गाइं पा०) जाणाइं उवट्ठवेह, चंपं णयरिं सब्भितरबाहिरियं आसित्त(सम्मज्जिओवलित्तं सिंघाडगतिगचउक्कचच्चरचउम्महमहापहपहेसु पा०) सित्तसित्तसुरइसम्मट्ठदुरत्थं तरावणवीहियं मंचाइमंचकलियं णाणाविहरागउच्छियज्झयपडागाइपडागमंडिअं लाउल्लोइयमहियं गोसीससीससरत्तचंदणजावगंधवट्ठिभूअं करेह कारवेह ता एअमाणत्तिअं पच्चप्पिणाहि निज्जइस्सामि समणं भगवं महावीरं अभिवंदए । २९ । तए णं से बलवाउए कूणिएणं रण्णा एवं वुत्ते समाणे हट्ठुट्ठजावहिअए करयलपरिग्गहिअं सिरसावत्तं मत्थए अंजलिं कट्ठु एवं सामित्ति आणाए विणएणं वयणं पडिसुणेइ ता हत्थिबाउअं आमंतेइ ता एवं व०- खिप्पामेव भो देवाणुप्पिया ! कूणिअस्स रण्णो भंभसारपुत्तस्स आभिसेक्कं हत्थिरयणं पडिकप्पेहि हयगयरहपवरजोहकलियं चाउरंगिणिं सेणं सण्णाहेहि ता एअमाणत्तिअं पच्चप्पिणाहि, तए णं से हत्थिवाउए बलवाउअस्स एअमट्ठं सोच्चा आणाए विणएणं वयणं पडिसुणेइ ता छेआयरियउवएसमइविकप्पणाविकप्पेहिं सुणिउणेहिं उज्जलणेवत्थहत्थपरिवत्थिअं सुसज्जं वम्मिअसण्ण- ब्रबद्धकवइयउप्पीलियकच्छवच्छगेवेयबद्धग- लवरभूसणविरायंतं अहियतेअजुत्तं (सललिय पा०) वरकण्णपूरविराइअं पलंबउच्चूलमहुअर(विरइयवरकण्णपूरसललियपलंबावचूलचामरोक्कर पा०)कयंधयारं चित्तपरिच्छेअपच्छयं (सचावसर पा०)पहरणावरणभरिअजुद्धसज्जं सच्छत्तं सज्झयं सघटं सपडागं पंचामेलअपरिमंडिआभिरामं ओसारियजमलजुअलघटं विज्जुपिणद्धं कालमेहं उप्पाइयपव्वयं चंकमंतं(सक्खं पा०) मत्तं गुलगुलंतं (महामेघं पा०) मणपवणजइण(सिंघ पा०)वेगं भीमं संगामियाओज्जं आभिसेक्कं हत्थिरयणं पडिकप्पइ ता हयगयरहपवरजोहकलियं चाउरंगिणिं सेणं सण्णाहेइ ता जेणेव बलवाउए तेणेव उवागच्छइ ता एअमाणत्तिअं पच्चप्पिणइ, तए णं से बलवाउए जाणसालिअं सद्दावेइ ता एवं व०- खिप्पामेव भो देवाणुप्पिया ! सुभद्दापमुहाणं देवीणं बाहिरियाए उवट्ठाणसालाए पाडिएक्कपाडिएक्काइं जत्ताभिमुहाइं जुत्ताइं जाणाइं उवट्ठवेह ता एअमाणत्तिअं पच्चप्पिणाहि, तए णं से जाणसालिए बलवाउअस्स एअमट्ठं आणाए विणएणं वयणं पडिसुणेइ ता जेणेव जाणसाला तेणेव उवागच्छइ ता जाणाइं पच्चुवेक्खेइ ता जाणाइं संपमज्जेइ ता जाणाइं संवट्ठेइ ता जाणाइं णीणेइ ता जाणाणं दूसे पवीणेइ ता जाणाइं समलंकरेइ ता जाणाइं वरभंडकमंडियाइं करेति ता जेणेव वाहणसाला तेणेव उवागच्छइ ता वाहणाइं पच्चुवेक्खेइ ता वाहणाइं संपमज्जइ ता वाहणाइं णीणेइ ता वाहणाइं अप्फालेइ ता दूसे पवीणेइ ता दूसे पवीणेइ ता वाहणाइं समलंकरेइ ता वाहणाइं वरभंडकमंडियाइं करेइ ता वाहणाइं जाणाइं जोएइ ता पओदलट्ठिं पओअधरे अ संमं आडहइ ता वट्ठमग्गं गाहेइ ता जेणेव बलवाउए तेणेव उवागच्छइ ता बलवाउअस्स एअमाणत्तिअं पच्चप्पिणइ, तए णं से बलवाउए णयरगुत्तिए आमंतेइ ता एवं व०- खिप्पामेव भो देवाणुप्पिया ! चंपं णयरिं सब्भितरबाहिरियं आसित्त जाव कारवेत्ता एअमाणत्तिअं पच्चप्पिणाहि, तए णं से णयरगुत्तीए बलवाउअस्स एअमट्ठं आणाए विणएणं पडिसुणेइ ता चंपं णयरिं सब्भितरबाहिरियं आसित्त जाव कारवेत्ता जेणेव बलवाउए तेणेव उवागच्छइ ता एअमाणत्तिअं पच्चप्पिणइ, तए णं से बलवाउए कोणिअस्स रण्णो भंभसारपुत्तस्स आभिसेक्कं हत्थिरयणं पडिकप्पिअं पासइ हयगय जाव सण्णाहिअं पासइ सुभद्दापमुहाणं देवीणं पडिजाणाइं उवट्ठविआइं पासइ चंपं णयरिं सब्भितरजाव गंधवट्ठिभूअं कयं पासइ ता हट्ठुट्ठचित्तमाणंदिए पीअमणे जाव हिअए जेणेव कूणिए राया भंभसारपुत्ते तेणेव उवागच्छइ ता करयलजाव एवं व०- कप्पिए णं देवाणुप्पियाणं आभिसिक्के हत्थिरयणे हयगयपवरजोहकलिया य चाउरंगिणी सेणा सण्णाहिआ सुभद्दापमुहाणं च देवीणं बाहिरियाए अ उवट्ठाणसालाए पाडिएक्कपाडिएक्काइं जत्ताभिमुहाइं जुत्ताइं जाणाइं उवट्ठावियाइं चंपा णयरी सब्भितरबाहिरिया आसित्तजाव गंधवट्ठिभूआ कया तं निज्जंतु णं देवाणुप्पिया ! समणं भगवं महावीरं अभिवंदआ । ३० । तए णं से कूणिए राया भंभसारपुत्ते बलवाउअस्स अंतिए एयमट्ठं सोच्चा णिसम्म हट्ठुट्ठजाहिअए जेणेव अट्ठणसाला तेणेव

उवागच्छइ ता अट्टणसालं अणुपविसइ ता अणेगवायमजोगवग्गणवामदणमल्लजुद्धकरणेहिं संते परिस्सते सयपागसहस्सपागेहिं सुगंधतेल्लमाइएहिं दप्पणिज्जेहिं मयणिज्जेहिं बिहणिज्जेहिं सव्विंदियगायपल्हायणिज्जेहिं अब्भंगेहिं अब्भंगिए समाणे तेल्लचम्मंसि पडिपुण्णपाणिपायसुकुमालकोमलतलेहिं पुरिसेहिं छेएहिं दक्खेहिं पत्तट्ठेहिं कुसलेहिं मेहावीहिं निउणसिप्पोवगएहिं अब्भंगणपरिमद्वणुव्वलणकरणगुणणिम्माएहिं अट्टिसुहाए मंससुहाए तयासुहाए रोमसुहाए चउव्विहाए संवाहणाए संवाहिए समाणे अवगयखेअपरिस्समे अट्टणसालाउ पडिणिक्खमइ ता जेणेव मज्जणधरे तेणेव उवागच्छइ ता मज्जणधरं अणुपविसइ ता समुत्त(समन्त० पा०) जालाउलाभिरामे विचित्तमणियरयणकुट्टिमतले रमणिज्जे ण्हाणमंडवंसि णाणामणिरयणभत्तिचित्तंसि ण्हाणपीढंसि सुहणिसण्णे सुद्धोदएहिं गंधोदएहिं पुप्फोदएहिं सुहोदएहिं पुणो कल्लाणगपवरमज्जणविहीए मज्जिए तत्थ कोउअसएहिं बहुविहेहिं कल्लाणगपवरमज्जणावसाणे पम्हलसुकुमालगंधकासाइयलूहिअंगे सरससुर हिगोसीस चंदणाणुलित्तगते अहय सुमहघदूस रयण सुसंवुए सुइमालावण गविलेवणे आविद्धमणिसुव्वण्णे कप्पियहारद्धहारतिसरयपालंबमाणकडिसुत्तसुकयसोभे पिणद्धगे विज्जे अंगुलिज्ज गललियगललिय कयाभरणे वरकडग तुडिय थंभिअभुए अहियरूवस स्सिरीए (मुद्धिआपिंगलं गुलिए कुंडल पा०) उज्जा विआणणे मउडदित्तसिरए हारोत्थयसुकयरइयवच्छे पालंबपलंब माणपडसुकय उत्तरिज्जे णाणामणिकण गरयणविमलमहरिहणित्तो विअमिसिसंतविर इयसुसिलिट्ठविसिट्ठलट्ठआविद्धवीरवलर,, किं बहुणा ?, कप्परुक्खए चेव अलंकियविभूसिए णरवई सकोरंटमल्लदामेणं छत्तेणं धरिज्जमाणेणं (अब्भपडलपिंगलुज्जलेण अविरलसमसहियचंदमंडलसमप्पभेणं मंगलसयभत्तिच्छेयविचित्तियखिंखिणिमणिहेमजाल विरइपरिगयपेरंतकणग घंटियापयलियकिणिकिं तसुइसुहसुमहुर सद्दालसोहिणं सप्पयरवरमुत्तसमलंबंतभूसणेणं नरिंदवामप्पमाणरुंदपरिमंडलेणं सीयायववायवस्सिविसदोसनासणेणं तमरयमल बहलपडलधाडणप्प भाकरेणं उउसुहसि वच्छायसमणुबद्धेणं वेरुलियदंडसज्जिएणं वइरामवत्थिनिउणाजोइय- अट्टसहस्सवरकंचणसलागनिम्मिएणं सुनिम्मलरययसुच्छएणं निउणोवियमिसिमिसिंतमणिरयणसूरमंडलवित्तिमिरकरं निग्गयग्गपडिहयपुणरविपच्चायदंतचंचलमिरिइकवयं विणिम्मुयंतेणं सपडिदंडेणं धरिज्जमाणेणं आयवत्तेणं विरायंते पा०) चउचामरवालवीजियंगे (चउहि य ताहि य) पवरगिरिकुहरविचणसुमुइयनिरुवहचमरपच्छिमसरीरसंजायसंगयाहिं अमलियसियकमलविमलुज्जयरययगिरिसिहरविमलससिकिरणसरिसकलधोयनिम्मलाहिं पवणाहयचवलललियतरंगहत्थनच्चंतवीइपसरिय- खीरोदगपवरसागरुप्पूरचंचलाहिं माणससरपरिसरपरिचियावासविसयवेसाहिं कणगगिरिसिहरसंसिसयाहिं उवइयउप्पइयतुरियचवलजइणसिग्घवेयाहिं हंसवधूयाहिं चेव कलिए णाणामणिकणगरयणविमलमहरिहंतवणिज्जुलविचित्तदंडाहिं चिल्लियाहिं नरवइसिरिसमुदयपगासणकरीहिं वरपट्टणुग्गयाहिं समिद्धराय कुलसेवियाहिं कालागुरुपवरकुंदुरुक्कतुरुक्कवरवण्णवासगंधुद्धुयाभिरामाहिं सललियाहिं उभओपासंमि उक्खिप्पमाणाहिं चामराहिं सुहसीयलवायवीइयंगे पा०) मंगलजयसदकयालोए मज्जणधराओ पडिनिक्खमइ ता अणेगगणनायगदंडनायगराईसरतलवरमाडंबियकोडुंबियइब्भसेट्टिसोणावइसत्थवाहदूअसंधिवाल सद्धिं संपरिवुडे धवलमहामेहणिग्गएइव गहगणदिप्पंतरिक्खतारागणाण मज्झे ससिक्ख पिअदंसणे णरवई जेणेव बाहिरिआ उवट्टाणसाला जेणेव आभिसेक्के हत्थिरयणे तेणेव उवागच्छइ ता अंजणगिरिकूडसणिभं गयवइं णखई दुरूढे, तए णं तस्स कूणियस्स रण्णे भंभसारपुत्तस्स आभिसिक्कं हत्थिरयणं दुरूढस्स समाणस्स तप्पढमयाए इमे अट्टमंगलया पुरओ अहाणुपुव्वीए संपट्टिआ, तं०- सोवत्थियसिरिवच्छणंदिआवत्तवद्धमाणकभद्दासणकलसमच्छदप्पणा, तयाऽणंतं च णं पुण्णकलसभिंजारं दिव्वा य छत्तपडागा सचामरा दंसणरइअआलोअदरिसणिज्जा वाउद्धूयविजयवेजयंती उस्सिआ गगणतलमणुलिहंती पुरओ अहाणुपुव्वीए संपट्टिआ, तयाऽणंतं च णं वेरुलियभिसंतविमलदंडं पलंबकोरंटमल्लदामोवसोभियं चंदमंडलणिभं समूसिअविमलं आयवत्तपवरं सीहासणं वरमणिरयणपादपीढं सपाउआजोयसमाउत्तं बहु(दासीदास पा०)किंकरकम्मकरपुरिसपायत्तपरिक्खित्तं पुरओ अहाणुपुव्वीए संपट्टियं, तयाऽणंतं बहवे असिग्गाहा लट्ठिग्गाहा कुंतग्गाहा चावग्गाहा चामरग्गाहा पासग्गाहा पोत्थयग्गाहा फलग्गाहा पीढग्गाहा वीणग्गाहा कूडग्गाहा हडप्फग्गाहा पुरओ अहाणुपुव्वीए संपट्टिआ, तयाऽणंतं बहवे डंडिणे

मुंडिणो सिहंडिणो जडिणो पिंछिणो हासकरा डमरकरा चाडुकरा वादकरा कंदप्पकरा दक्करा कोक्कुइआ किट्टि(त्ति)करा वायंता गायंता हसंता णच्चंता भासंता सावेंता रक्खंता (पविंता पा०) आलोंअं च करमाणा जयरसदं पउंजमाणा पुरओ अहाणुपुव्वीए संपट्टिआ, ('असिलट्टिकुंतचावचामरपासे य फलगपोत्थे या वीणाकूडग्गाहे तत्तो य हडप्फगाहे य ॥१॥ दंडी मुंडी सिहंडी पिच्छी जडिणो य हासकिड्डा य दवकारा चडुकारा कंदप्पिय कोक्कुइय गाहा ॥२॥ गायंता वायंता नच्चंता तह हसंत हासिंता । सावेंता रावेंता आलोयजयं पउंजंता ॥३॥पा०) तयाऽणंतरं जच्चाणं तरमल्लिहायणाणं (वरमल्लिभासणाणं पा०) हरिमेलामउलमल्लियच्छाणं चंचुच्चियललिअपुलियचलचवलचवलचंचलगईणं लंघणवग्गणधावणधोरणतिवईजइणसिक्खिअगईणं ललंतलामगललायवरभूसणाणं मुहभंडगउच्चूलगथासगअहिलाणचामरण्डपरिमंडियकडीणं किंकरवरतरुणपरिगहिआणं अट्टसयं वरतुरगाणं पुरओ अहाणुपुव्वीए संपट्टियं, तयाऽणंतरं च णं इसीदंताणं ईसीमत्ताणं ईसीतुंगाणं ईसीउच्छंगविसालधवलदंताणं कंचणकोसीपविट्टदंताणं कंचणमणिरयणभूसियाणं वरपुरिसारोहण(सु पा०)संपउत्ताणं अट्टसयं गयाणं पुरओ अहाणुपुव्वीए संपट्टियं, तयाऽणंतरं सच्छत्ताणं सज्झयाणं सघंटाणं सपडागाणं सतोरणवराणं सणंदिघोसाणं संखिखिणीजालपरिक्खित्ताणं हेमवयचित्तिणिसकणकणिजुत्तदारुआणं कालायससुकयणेमिजंतकम्माणं सुसिलिट्ठवत्त(सुसंविद्धचक्क पा०) मंडलधुराणं आइण्णवरतुरगसुसंपउत्ताणं कुसलनरच्छेअसारहिससंपग्गहिआणं (हेमजालगवक्खजालखिंखिणिघंटाजालपरिक्खित्ताणं पा०)बत्तीसतोणपरिमंडिआणं सकंकडवडेंसकाणं सचावसरपहरणावरणभरिअजुद्धसज्जाणं अट्टसयं रहाणं पुरओ अहाणुपुव्वीए संपट्टियं, तयाऽणंतरं च णं असिसत्तिकोंततोमरसूललउडभिंडिमालधणुपाणिसज्जं पायत्ताणीयं (सन्नद्धबद्धवम्मियकवइयाणं पा०) पुरओ अहाणुपुव्वीए संपट्टिअं, तए णं से कूणिए राया हारोत्थयसुकयरइयवच्छे कुंडलउज्जोविआणणे मउडदित्तिसिए णरसीहे णरवई णरिंदे णरसहे मणुअरायवसभकप्पे अब्भहिअरायतेअलच्छीए दिप्पमाणे हत्थिक्खंधवरगए सकोरंटमल्लदामेणं छत्तेणं धरिज्जमाणेणं सेअवरचामराहिं उद्धुव्वमाणीहिं २ वेसमणोचेव णरवई अमरवईसण्णिभाए इड्ढीए पहियकित्ती हयगयरहपवरजोहकलियाए चाउरंगिणीए सेणाए समणुगम्ममाणमग्गे जेणेव पुण्णभद्दे चेइए तेणेव पहारित्थ गमणाए, तए णं तस्स कूणिअस्स रण्णो भंभसारपुत्तस्स पुरओ महंआसा आसधरा(वरा पा०)उभओ पासिं णागा णागधरा पिट्ठओ रहसंगेल्ली, तए णं से कूणिए राया भंभसारपुत्ते अब्भुग्गयभिंगारे पग्गहियतालियंटे उच्छियसेअच्छत्ते पवीइअबालवीयणीए सव्विड्ढीए सव्वजुत्तीए सव्वबलेणं सव्वसमुदएणं सव्वादरेणं सव्वबिभूईए सव्वविभूसाए सव्वसभमेणं सव्वपुप्फगंधवासमल्लालंकारेणं (सव्वसंभमेणं पगईहिं नाय(ड)गेहिं तालायरेहिं सव्वोरोहेहिं सव्वपुप्फवत्थगन्धमल्लालंकारविभूसाए पा०) सव्वतुडिअसदसण्णिणाएणं महया इड्ढीए महयाजुत्तीए महया बलेणं महया समुदएणं महया वरतुडिअजमगसमगप्पवाइएणं संखपणवपडहभेरिझल्लरिखरमुहिकक्कमुरवमुअंगदुंदुणिगघोसणाइयरवेणं चंपाए णयरीए मज्झंमज्झेणं णिग्गच्छइ ॥३१॥ तए णं कूणि अस्स रण्णो चंपानगरिं मज्झंमज्झेणं णिग्गच्छमाणस्स बहवे अत्थत्थिया कामत्थिया भोगत्थिया किब्बिसिअ करोडिआ लाभत्थिया कारवाहिया संखिआ चक्किया णंगलिया मुहमंगलिआ वद्धमाणा पुस्समाणवा खंडियगणा ताहिं इट्ठाहिं कंताहिं पिआहिं मणुण्णाहिं मणामाहिं मणोभिरामाहिं हिययगमगणिज्जाहिं(मणोभिरामाहिं उरालाहिं कल्लाणाहिं सिवाहिं धण्णाहिं मंगल्लाहिं सस्सिरीयाहिं हिययगमगणिज्जाहिं हियपल्लहायणिज्जाहिं मियमहुरगंभीरगाहिगाहिं अट्टसइयाहिं अपुणरुत्ताहिं पा०) जयविजयमंगलसएहिं अणवरयं अभिणंदंता य अभिथुणंता य एवं व०- जय २ णंदा ! जय २ भद्दा ! भदं ते अजियं जिणाहि जिअं च पालेहि जिअमज्झे वसाहि इंदोइव देवाणं चमरोइव असुराणं धरणोइव नागाणं चंदोइव ताराणं भरहोइव मणुआणं बहूइं बासाइं बहुइ वाससआइं बहूइं वाससय(वास)सहस्साइं अणहसमग्गो हट्ठतुट्ठो परमाउं पलायाहि इट्ठजनसंपरिवुडो चंपाए णयरीए अण्णेसिं च बहूणं गामागरणयकखेडकब्बडमडंबदो- णमुहपट्ठणआसमनिगमसंवाहसंनिवेसाणं आहेवच्चं पोरेवच्चं सामित्तं भट्ठित्तं महत्तरगत्तं आणाईसरसेणावच्चं कारेमाणे पालेमाणे महयाऽऽयणट्ठगीयवाइयतंतीतलतालतुडियघणमुअंगपडुप्पवाइअरवेणं विउलाइं भोगभोगाइं भुंजमाणे

विहराहित्तिकट्टु जय२सदं पउंजंति, तए णं से कूणिए राया भंभसारपुत्ते णयणमालासहस्सेहिं पेच्छिज्जमाणे २ हिअयमालासहस्सेहिं अभिणंदिज्जमाणे २ (उन्नइज्जमाणे पा०) मणोरहमालासहस्सेहिं विच्छिप्पमाणे २ वयणमालासहस्सेहिं अभिथुव्वमाणे २ कंतिसोहग्गुणेहिं पत्थिज्जमाणे २ बहूणं णरणारीसहस्साणं दाहिणहत्थेणं अंजलिमालासहस्साइं पडिच्छमाणे २ मंजुमंजुणा घोसेणं पडिबुज्झमाणे २ भवणपंतिसहस्साइं समइच्छमाणे २ (तंतीतलतालतुडियगीयबाइयरवेणं महुरेणं जयसदुग्घोसवि(मी)सएणं मंजुमंजुणा घोसेणं अपडिबुज्झमाणे पा०) चंपाए णयरीए मज्झंमज्झेणं णिग्गच्छइ ता जेणेव पुण्णभद्दे चेइए तेणेव उवागच्छइ ता समणस्स भगवओ महावीरस्स अदूरसामंते छत्ताइए तित्थराइसेसे पासइ ता आभिसेक्कं हत्थिरयणं ठवेइ ता आभिसेक्काओ हत्थिरयणाओ पच्चोरुहइ ता अवहट्ठ पंच रायककुहाइं, तं०-खग्गं छत्तं उप्फेसं वाहणाओ वालवीअणं, जेणेव समणे भगवं महावीरे तेणेव उवागच्छइ ता समणं भगवं महावीरं पंचविहेणं अभिगमेणं अभिगच्छति तं०-सच्चित्ताणं दव्वाणं विउसरणयाए अचित्ताणं दव्वाणं अविउसरणयाए एगसाडियउत्तरासंगकरणेणं चक्खुफासे अंजलिपग्गहेणं (चक्खुप्फासे हत्थिक्खंधविट्ठंभणयाए पा०) मणसो एगत्ती भावकरणेणं समणं भगवं महावीरं तिक्खुत्तो आयाहिणपयाहिणं करेइ ता वंदति णमंसति ता तिविहाए पज्जुवासणाए पज्जुवासइ तं०-काइयाए वाइयाए माणसियाए, काइयाए ताव संकुइअग्गहत्थपाए सुस्सूसमाणे णमंसमाणे अभिमुहे विणएणं पंजलिउडे पज्जुवासइ वाइयाए जं जं भगवं वागरेइ एवमेअं भंते ! तहमेयं भंते ! अविहमेयं भंते ! असंदिद्धमेअं भंते ! इच्छिअमेअं भंते ! पडिच्छिअमेअं भंते ! इच्छियपडिच्छियमेअं भंते ! से जहेयं तुब्भे वदह अपडिकूलमाणे पज्जुवासति माणसियाए महया संवेगं जणइत्ता तिव्वधम्मणुरागरत्तो पज्जुवासइ । ३२ । तए णं ताओ सुभद्दपमुहाओ देवीओ अंतो अंतेउरंसि ण्हयाओ जाव पायच्छित्ताओ सव्वालंकारविभूसियाओ बहूहिं खुज्जाहिं चिलायाहिं वामणीहिं वडभीहिं बब्बरीहिं पयाउसियाहिं जोणिआहिं पण्हविआहिं इसिगिणिआहिं वासिइणिआहिं लासियाहिं लउसियाहिं सिंहलीहिं दमिलीहिं आरबीहिं पुलंदीहिं पक्कणीहिं बहलीहिं मुरुंडीहिं सबरियाहिं पारसीहिं णाणादेसी(प्र० हि य) विदेसपरिमंडिआहिं इंगियचिंतियपत्थिय(मणोगत प०) विजाणियाहिं सदेसणेवत्थगहियवेसाहिं चेडियाचक्कवालवरिसधरकंचुइज्जमहत्तरगवंदं परिकिखत्ताओ अंतेउराओ णिग्गच्छति ता जेणेव पाडिएक्कपाडिएक्काइं जाणाइं तेणेव उवागच्छन्ति ता पाडिएक्कपाडिएक्काइं जत्ताभिमुहाइं जुत्ताइं जाणाइं दुरूहंति ता णिअगपरिआल सद्धिं संपरिवुडाओ चंपाए णयरीए मज्झंमज्झेणं णिग्गच्छंति ता जेणेव पुण्णभद्दे चेइए तेणेव उवागच्छंति ता समणस्स भगवओ महावीरस्स अदूरसामंते छत्तादिए तित्थयरातिसेसे पासंति ता पाडिएक्कपाडिएक्काइं जाणाइं ठवंति ता जाणहिंतो पच्चोरुहंति ता बहूहिंखुज्जाहिं जाव परिकिखत्ताओ जेणेव समणे भगवं महावीरे तेणेव उवागच्छंति ता समणं भगवं महावीरं पंचविहेणं अभिगमेणं अभिगच्छंति तं०-सच्चित्ताणं दव्वाणं विउसरणयाए अचित्ताणं दव्वाणं अविउसरणयाए विरओणताए गायलीट्टीए चक्खुप्फासे अंजलिपग्गहेणं मणसो एगत्तभावकरणेणं समणं भगवं महावीरं तिक्खुत्तो आयाहिणं पयाहिणं करेन्ति ता वंदंति णमंसंति ता कूणियरायं पुरओ कट्टु ठिइयाओ चेव सपरिवाराओ अभिमुहाओ विणएणं पंगलिउडाओ पज्जुवासंति । ३३ । तए णं समणे भगवं महावीरे कूणिअस्स भंभसारपुत्तस्स सुभद्दप्पमुहाणं देवीणं तीसे अ महतिमहालियाए परिसाए इसीपरिसाए मुणिपरिसाए जझरिसाए देवपरिसाए अणेगसयाए अणेगसयवंदाए अणेगसयवंदपरिवाराए ओहबले अइबले महब्बले अपरिमिअबलवीरियतेयमाहप्पकंतिजुत्ते सारयनवत्थणियमहुरगंभीरकोंचणिग्घोसदुंदुभिस्सरे उरेवित्थडाए कंठेऽवट्ठियाए सिरे समाइण्णाए अगरलाए अम्मणाए सव्वक्खरसण्णिवाइयाए पुण्णरत्ताए सव्वभासाणुगामिणीए सरस्सईए(फुडविसयमहुरगंभीरगाहियाए सव्वक्खरसण्णिवाइयाए पा०) जोयणणीहारिणा सरेणं अब्भमागहाए भासाए, भासति अरिहा धम्मं परिकहेइ. तेसिं सव्वेसिं आरियमणारियाणं अगिलाए धम्ममाइक्खइ, साऽविय णं अब्भमागहा भासा तेसिं सव्वेसिं आरियमणारियाणं अप्पणो सभासाए परिणामेणं परिणमइ तं०-अत्थि लोए अत्थि अलोए एवं जीवा अजीवा बंधे मोक्खे पुण्णे पावे आसवे संवरे वेयणा णिज्जरा अरिहंता चक्कवट्टी बलदेवा वासुदेवा नरका णेरइया तिरिक्खजोणिआ तिरिक्खजोणिणीओ माया पिया रिसओ देवा देवलोआ सिद्धी सिद्धा परिणिव्वाणं परिणिव्वया अत्थि पाणाइवाए मुसावाए अदिण्णादाणे मेहुणे परिग्गहे अत्थि कोहे माणे माया लोभे जाव मिच्छादंसणसल्ले अत्थि पाणाइवायवेरमणे मुसावायवेरमणे

अदिण्णादाणवेरमणे मेहुणवेरमणे परिग्गहवेरमणे जाव मिच्छादंसणसल्लविवेगे सव्वं अत्थिभावं अत्थित्ति वयति सव्वं णत्थिभावं णत्थित्ति वयति सुचिण्णा कम्मा सुचिण्णफला भवंति दुच्चिण्णा कम्मा दुचिण्णफला भवंति फुसइ पुण्णपावे पच्चायंति जीवा, सफले कल्लाणपावए धम्ममाइक्खइ-इणमेव णिग्गंथे पावयणे सच्चे अणुत्तरे केवलिए संसुद्धे पडिपुण्णे णेआउए सल्लकत्तणे सिद्धिमग्गे मुत्तिमग्गे णिव्वाणमग्गे णेज्जाणमग्गे अवितहमविसंधि सव्वदुक्खप्पहीणमग्गे इहट्ठिआ जीवा सिज्झंति बुज्झंति मुच्चंति परिणिव्वायंति सव्वदुक्खाणमंतं करंति, एगच्चा पुण एगे भयंतारो पुच्चकम्मावसेसेणं अण्णयरेसु देवलोएसु देवत्ताए उववत्तारो भवंति महइढीएसु जाव महासुक्खेसु दूरंगइएसु चिरट्ठिईएसु, ते ण तत्थ देवा भवंति महट्ठिया जाव चिरट्ठिईआ हारविराइयवच्छा जाव पभासमाणा कप्पोवगा गतिकल्लाणा आगमेसिभद्दा जाव पडिरूवा, तमाइक्खइ एवं खलु चउहिं ठाणेहिं जीवा णेरइअत्ताए कम्मं पकरंति ता णेरइएसु उववज्जंति तं०-महारंभयाए महापरिगहयाए पंचिंदियवहेणं कुणिमाहारेणं, एवं एणं अभिलावेणं तिरिक्खजोणिएसु माइल्लयाए णिअडिल्लयाए अलिअवयणेणं उक्कंचणयाए वंचणयाए मणुस्सेसु पगतिभदयाए पगतिविणीतताए साणुक्कोसयाए अमच्छरियताए देवेसु सरागसंजमेणं संजमासंजमेणं अकामणिज्जराए बालतवोकम्मेणं तमाइक्खइ-‘जह णरगा गम्मंति जे णरगा गम्मंति जे णरगा जा य वेयणा शरए । सारीरमाणसाइं दुक्खाइं तिरिक्खजोणिए ॥१॥ माणुस्सं च अणिच्चं वाहिजरावरणवेयणापउरं । देवे अ देवलोए देविह्मं देवसोक्खाइहं ॥२॥ णरगं तिरिक्खजोणिं माणुसभावं च देवलोअं च । सिद्धे अ सिद्धवसहिं छज्जीवणियं परिकहेइ ॥३॥ जह जीवा बज्झंती मुच्चंती जह य परिकिलिस्संति । जह दुक्खाणं अंतं करंति केई अपडिबद्धा ॥४॥ अट्ठदुह(णिय पा०)ट्ठियचित्ता जह जीवा दुक्खसागरमुविंति । जह वेरग्गमुवगया कम्मसमुग्गं विहाडंति ॥५॥ (एवं खलु जीवा निस्सीला णिव्वया णिग्गुणा निम्मेरा णिप्पच्चक्खाणपोसहोववासा अक्कोहा णिक्कोहा छीणकोहा अणुपुव्वेणं पा०) जहा राणेण कडाणं कम्माणं पावगो फलविवागो जह य परिहीणकम्मा सिद्धा सिद्धालयमुविंति, तमेव धम्मं दुविहं आइक्खइ, तं०-अगारधम्मं अणगारधम्मं च, अणगारधम्मो ताव इह खलु सव्वओ सव्वत्ताए मुंडे भवित्ता आगारातो अणगारियं पव्वयइ सव्वाओ पाणाइवायाओ वेरमणं मुसावाय० अदिण्णादाण० मेहुण० परिग्गह० राईभोयणाउ वेरमणं, अयमाउसो ! अणगारसामइए धम्मे पं०, एअस्स धम्मस्स सिक्खाए उवट्ठिए निग्गंथे वा निग्गंथी वा विहरमाणे आणाए आराहए भवति, अगारधम्मं दुवालसविहं आइक्खइ, तं०-पंच अणुव्वयाइं तिण्णि गुणवयाइं चत्तारि सिक्खावयाइं, पंच अणुव्वयाइं, तं०-थूलाओ पाणाइवायाओ वेरमणं थूलाओ मुसावायाओ० थूलाओ अदिन्नादाणाओ० सदारसंतोसे इच्छापरिमाणे तिण्णि गुणव्वयाइं तं०-अणत्थदंडवेरमणं दिसिस्सव्वं उवभोगपरिभोगपरिमाणं, चत्तारि सिक्खावयाइं तं०-सामाइअं देसावगासियं पोसहोववासे अतिहिसंजयस्स विभागे, अपच्छिमा मारणंतिआ संलेहणाजूसणाराहणा, अयमाउसो ! अगारसामाइए धम्मे पं०, धम्मस्स सिक्खाए उवट्ठिए समणोवासए समणोवासिआ वा विहरमाणे आणाइ आराहए भवति । ३४। तए णं सा महतिमहालिया मणूसपरिसा समणस्स भगवओ महावीरस्स अंतिए धम्मं सोच्चा णिसम्म हट्ठतुट्ठजावहिया उट्ठाए उट्ठेति ता समणं भगवं महावीरं तिक्खुत्तो आयाहिणपयाहिणं करेइ ता वंदति णमंसति ता अत्थेगइआ मुंडे भवित्ता आगाराओ अणगारियं पव्वइया, अत्थेगइआ पंचाणुव्वइयं सत्तसिक्खवइअं दुवालसविहं गिहिधम्मं पडिवण्णा, अवसेसा णं परिसा समणं भगवं महावीरं वंदति णमंसति ता एवं व०-सुअक्खाए ते भंते ! णिग्गंथे पावयणे एवं सुपण्णत्ते सुभासिए सुविणीए सुभाविए अणुत्तरे ते भंते ! णिग्गंथे पावयणे, धम्मं णं आइक्खमाणां तुब्भे उपसभंआइक्खह उवसमं आइक्खमाणा विवेगं आइक्खह विवेगं आइक्खमाणा वेरमणं आइक्खह वेरमणं आइक्खमाणा अकरणं पावाणं कम्माणं आइक्खह, णत्थि णं अण्णे केई समणे वा माहणे वा जे एरिसं धम्ममाइक्खित्तए किमंग पुण इत्तो उत्तरतरं ?, एवं वदित्ता जामेव दिसं पाउब्भूआ तामेव दिसं पडिगया । ३५। तए णं कूणिए राया भंभसारपुत्ते समणस्स भगवओ महावीरस्स अंतिए धम्मं सोच्चा णिसम्म हट्ठतुट्ठजावहियए उट्ठाए उट्ठेइ ता समणं भगवं महावीरं तिक्खुत्तो आयाहिणपयाहिणं करेति ता वंदति णमंसति ता एवं व०-सुअक्खाए ते भंते ! णिग्गंथे पावयणे जाव किमंग पुण एत्तो उत्तरतरं ?, एवं वदित्ता जामेव दिसं पाउब्भूए तामेव दिसं पडिगए । ३६। तए णं ताओ सुभद्दपमुहाओ देवीओ समणस्स भगवओ महावीरस्स अंतिए धम्मं सोच्चा णिसम्म

हटुतुजावहिअयाओ उट्टाए उट्टेइ ता समणं भगवं महावीरं तिकखुत्तो आयाहिणं पयाहिणं करेन्ति ता वंदंति णमंसंति ता एवं व०-सुअक्खाए णं ते भंते ! णिगंथे पावयणे जाव किमंग पुण इत्तो उत्तरतरं ?, एवं वदित्ता जामेव दिसिं पाउब्भूआओ जामेव दिसिं पडिगयाओ, समोसरणं, समत्तं । ३७। तेणं कालेणं० समणस्स भगवओ महावीरस्स जेठ्ठे अंतेवासी इंदभूर्ई नामं अणगारे गोयमसगोत्तेणं सत्तुस्सेहे समचउरंससंठाणसंठिए वइरोसहनारायसंघयणे कणगपुलगनिघसपम्हगोरे उग्गतवे दित्ततवे तत्ततवे महातवे घोरतवे उराले घोरे घोरगुणे घोरतवस्सी घोरबभचेरवासी उच्छूढसरीरे संखित्तविउलतेअलेस्से समणस्स भगवओ महावीरस्स अदूरसामंते उड्ढंजाणू अहोसिरे झाणकोट्टोवगए संजमेणं तवसा अप्पाणं भावेमाणे विहरति, तए णं से भगवं गोअमे जायसड्ढे जायसंसए जायकोऊहल्ले उप्पणसड्ढे उप्पणसंसए उप्पणकोऊहल्ले संजायसड्ढे संजायसंसए संजायकोऊहल्ले समुप्पणसड्ढे समुप्पणसंसए समुप्पणकोऊहल्ले उट्टलए उट्टेइ ता जेणेव समणे भगवं महावीरे तेणेव उवागच्छति ता समणं भगवं महावीरं तिकखुत्तो आयाहिणं पयाहिणं करेति ता वंदंति णमंसंति ता णच्चासण्णे णाइदूरे सुस्सूसमाणे णमंसमाणे अभिमुहे विणएणं पंजलिउडे पज्जुवासमाणे एवं व०-जीवे णं भंते ! असंजए अविरए अप्पडिहयपच्चक्खायपावकम्मे (१४१) सकिरिए असंवुडे एगंतदंडे एगंतबाले एगंतसुत्ते पावकम्मं अण्हाति ?, हंता अण्हाति, जीवे णं भंते ! असंजयअविरयअप्पडिहयपच्चक्खायपावकम्मे सकिरिए असंवुडे एगंतदंडे एगंतबाले एगंतसुत्ते मोहणिज्जं पावकम्मं अण्हाति ?. हंता अण्हाति, जीवे णं भंते ! मोहणिज्जं कम्मं वेदेमाणे मोहणिज्जं कम्मं बंधइ वेअणिज्जं कम्मं बंधइ ?, गोअमा ! मोहणिज्जं कम्मं बंधइ वेअणिज्जं कम्मं बंधति. णणत्थ चरिममोहणिज्जं कम्मं वेदेमाणे वेअणिज्जं कम्मं बंधइ णो मोहणिज्जं कम्मं बंधइ ३. जीवे णं भंते ! असंजए अविरए अप्पडिहयपच्चक्खायपावकम्मे सकिरिए असंवुडे एगंतदंडे एगंतबाले एगंतसुत्ते ओसण्णतसपाणघाती कालमासे कालं किच्चा णेरइएसु उववज्जति ?. हंता उववज्जति ४, जीवे णं भंते ! असंजए अविरए अप्पडिहयपच्चक्खायपावकम्मे इआ चुए देवे सिआ ?, गोअमा ! अत्थेगइए देवे सिया अत्थेगइए णो देवे सिया, से केणट्टेणं भंते ! एवं वु०-अत्थेगइए देवे सिआ अत्थेगइए णो देवे सिआ ?, गोअमा ! जे इमे जीवा गामागरणयरणिगमरायहाणिखेडकब्बडमंडबदोणमुहपट्टणासमसंबाहसण्णिवेसेसु अकामतण्हाए अकामछुहाए अकामबंभचेरवासेणं अकामअण्हाणकसीयायवंदसमसगसेअजल्लमल्लपंकपरितावेणं अप्पतरो वा भुज्जतरो वा कालं अप्पाणं पकिरिलेसंति ता कालमासे कालं किच्चा अण्णुतरेसु वाणमंतरेसु देवलोएसु देवत्ताए उववत्तारो भवंति, तहिं तेसिं गती तहिं तेसिं ठिती तहिं तेसिं उववाए पं०, तेसिं णं भंते ! देवाणं केवइअं कालं ठिई पं० ?, गोअमा ! दस वाससहस्साइं ठिई पं०, अत्थि णं भंते ! तेसिं देवाणं इड्ढीइ वा जुईइ वा जसेति वा उट्टाणेइ वा कम्मेइ वा बलेति वा वीरिएइ वा पुरिसक्कारपरिकमेइ वा ?, हंता अत्थि, ते णं भंते ! देवा परलोगस्साराहगा ?. णो तिणट्टे समट्टे ५, से जे इमे गामागरणयरणि गमरायहाणिखेडकब्बडमंड बदोणमुहपट्टणासमसंबाहसण्णिवेसेसु मणुआ भवंति, तं०-अंडुबद्धका णिअलबद्धका हडिबद्धका चारगबद्धका हत्थच्छिन्नका पायच्छिन्नका कण्णच्छिन्नका णक्कच्छिन्नका उट्टच्छिन्नका जिब्भच्छिन्नका सीसच्छिन्नका मुखच्छिन्नका मज्झच्छिन्नका वेकच्छिच्छिन्नका हियउप्पाडियगा णयणुप्पाडियगा दसणुप्पाडियगा वसणुपडियगा गीवच्छिन्नका तंडुलच्छिन्नका कागणिमंसक्खाइयया ओलंबिया लंबिअया घंसिअया घोलिअया फाडिअया पीलीअया सूलाइअया सूलभिण्णका खारवत्तिया वज्झवत्तिया सीहपुच्छियया दवग्गिदडिढयगा पंकोसण्णका पंकेखुत्तका वलयमयका वसट्टमयका णियाणमयका अंतोसल्लमयकागिरिपडिअका तरूणडियका मरूणडियगा गिरिपक्खंदोलिया तरूणक्खंदोलिया मरूणक्खंदोलिया जलपवेसिका जलणपवेसिका विसभक्खितका सत्थोवाडितका वेहाणसिआ गिद्धपिट्ठका कंतारमतका दुब्भिक्खमतका असंकिलिट्ठपरिणामा ते कालमासे कालं णिच्चा अण्णतरेसु वाणमंतरेसु देवलोएसु देवत्ताए उववत्तारो भवंति, तहिं तेसिं गती तहिं तेसिं ठिती तहिं तेसिं उववाए पं०, तेसिं णं भंते ! देवाणं केवइअं कालं ठिती पं० ?, गोअमा ! बारसवाससहस्साइंठिती पं०. अत्थि णं भंते ! तेसिं देवाणं इड्ढीइ वा जुईइ वा जसेति वा बलेति वा वीरिएइ वा पुरिसक्कारपरिकमेइ वा ?, हंता अत्थि, ते णं भंते ! देवा परलोगस्साराहगा ?, णो तिणट्टे ६, से जे इमे गामागरणयरणिगमरायहाणिखेड कब्बडमंडबदोणमुहपट्टणासमसंबाहसंनिवेसेसु मणुआ भवंति तं०-पगइभद्दगा पवइउवसंता

पगइपतणुकोहमाणमायालोहा मिउमद्वसंपण्णा अल्लीणा भद्दगा विणीआ अम्मापिउसुस्सूसका अम्मपिउणं अणतिक्रमणिज्जवयणा अप्पिच्छा अप्पारंभा अप्पपरिग्गहा अप्पेणं आरंभेणं अप्पेणं समारंभेण अप्पेणं आरंभसमारंभेणं वित्तिं कप्पेमाणा बहूइं वासाइं आउअं पालेंति त्ता कालमासे कालं किच्चा अण्णतरेसु वाणमंतरेसु देवलोएसु देवत्ताए उववत्तारो भवन्ति, तहिं तेसिं गती तहिं तेसिं ठिती तहिं तेसिं उववाए पं०, तेसिं णं भन्ते ! देवाणं केवइअं कालं ठिती पं० ?, गोयमा ! चउद्वसवाससहस्साइं ७, से जाओ इमाओ गामागरणयरणिगमरायहाणिखेडकब्बडमंडबदोणमुहपट्टणासमसंबाहसन्निवेसेसु इत्थियाओ भवन्ति तं०-अंतो अंतोउरियाओ गयपइआओ मयपइआओ बालविहवाओ छड्डियतल्लिताओ माइरक्खिआओ पिअरक्खिआओ भायरक्खिआओ कुलघररक्खिआओ (मित्तनाइनियसंबंधिरक्खियाओ पा०) ससुरकुलरक्खिआओ परूढणहके सकक्खरोमाओ ववगयपुप्फगंधमल्लालंकाराओ अण्हाणगसेअजल्लमलपंकपरिताविआओ ववगयखीर दहिणवणी असप्पितेल्लगुललोणमहुमज्जमंसपरिचत्तकयाहारओ अप्पिच्छाओ अप्पारंभाओ अप्पपरिग्गहाओ अप्पेणं आरंभेणं अप्पेणं समारंभेणं अप्पेणं आरंभसमारंभेणं वित्तिं कप्पेमाणीओ अकामबंभचेरवासेणं तमेव पइसेज्जं णाइक्कमइ ताओ णं इत्थिआओ एयारूवेणं विहारेणं विहरमाणीओ बहूइं वासाइं सेसं तं चेव जाव चउसट्ठिंवाससहस्साइं ठिई पं० ८, से जे इमे गामागरणयरणिगमरायहाणिखेडकब्बडमंडबदोणमुहपट्टणासमसंबाहसन्निवेसेसु मणुआ भवन्ति तं०-दगबिइया दगतइया दगसत्तमा दगएक्कारसमा गोअमा गोव्वइआ गिहिधम्मा धम्मचिंतका अविरूद्धविरूद्धवुड्डसावकप्पभिअओ तेसिं मणुआणं णो कप्पइ इमाओ नव रसविगईओ आहारित्तए तं०-खीरं दहिं णवणीयं सप्पिं तेल्लं फाणियं महुं मज्जं मंसं, णण्णत्थ एक्काए सरसवविगइए. ते णं मणुआ अप्पिच्छा तं चेव सव्वं णवरं चउरासीई वाससहस्साइं ठिई पं० ९, से जे इमे गंगाकूलगा वाणपत्था तावसा भवन्ति, तं०-होत्तिया पोत्तिया कोत्तिया जण्णई सड्डई थालई हुंपउट्ठा दंतुक्खलिया उम्मज्जका सम्मज्जका निमज्जका संपक्खाला दक्खिणकूलका उत्तरकूलका संखधमका कूलधमका मिगलुद्धका हत्थितावसा उदंडका दिसापोकक्खिणो वाकवासिणो अंबुवासिणो बिलवासिणो जलवासिणो (प्र० चेलवासिणो) वेलवासिणो रूक्खमूलिआ अंबूभक्खिणो वाउभक्खिणो सेवा लभक्खिणो मूलाहारा कंदाहारा तयाहारा पत्ताहारा पुप्फहारा बीयाहारा परिसडियकंदमूलतयपत्तपुप्फफलाहारा जलाभिसेअकढिणगायभूया आयावणाहिं पंचग्गितावेहिं इंगालसोल्लियं कंडुसोल्लियं कंठसोल्लियंपिव अप्पाणं करेमाणा बहूइं वासाइं परियायं पाउणंति त्ता कालमासे कालं किच्चा उक्कोसेणं जोइसिएसु देवेसु देवत्ताए उववत्तारो भवन्ति, पलिओवमं वाससयसहस्समब्भहिअं ठिई, आराहगा ?, णो इणट्ठे समट्ठे १०. से जे इमे जाव सन्निवेसेसुपव्वइया समणा भवन्ति, तं०-कंदप्पिया कुक्कुइया मोहरिया गीयरइप्पिया नच्चणसीला ते णं एएणं विहारेणं विहरमाणा बहूइं वासाइं सामण्णपरियायं पाउणंति त्ता तस्स ठाणस्स अणालोइअअप्पडिक्कंता कालमासे कालं किच्चा उक्कोसेणं सोहम्मे कप्पे कंदप्पिएसु देवेसु देवत्ताए उववत्तारो भवन्ति, तहिं तेसिं गती तहिं तेसिं ठिती सेसं तं चेव णवरं पलिओवमं वाससहस्समब्भहियं ठिती ११, से जे इमे जाव सन्निवेसेसु परिव्वायगा भवन्ति. तं०-संखा जोई कविला भिउच्चा हंसा परमहंसा बहुउदया कुडिव्वया कण्हपरिव्वायगा, तत्थ खलु इमे अट्ठ माहणपरिव्वायगा भवन्ति, तं०-‘कण्हे अ करकंडे य, अंबडे य परासरे । कण्हे दीवायणे चेव, देवगुत्ते अ णारए ॥६॥ तत्थ खलु इमे अट्ठ खत्तिपरिव्वायया भवन्ति, तं०-‘सीलई ससिहारे (य), णग्गई भग्गईतिअ । विदेहे रायराया य, रायारामे बलेति अ ॥७॥ ते णं परिव्वायगा रिउव्वेदजजुव्वेदसामवेयअहव्वणवय इतिहासपंचमाणं णिग्घंटुच्छट्ठाणं संगोवंगाणं सरहस्साणं चउण्हं वेयाणं सारगा पारगा धारगा वारगा सडंगवी सट्ठितंतविसारया संखाणे सिक्खाकप्पे वागरणे छंदे णिरूत्ते जोतिसामयणे अण्णेसु य बंभण्णएसु अ सत्थेसु (परिव्वायएसु य नएसु पा०) सुपरिणिट्ठिया यावि हुत्था, ते णं परिव्वायगा दाणधम्मं च सोअधम्मं च तित्थाभिसेअं च आघवेमाणा पण्णवेमाणा परूवेमाणा विहरन्ति, जण्णं अम्हे किंचि असुई भवति तण्णं उदएण य मट्ठियाए अ पक्खालिअं सुईभवति, एवं खलु अम्हे चोक्खा चोक्खायारा सुई सुइसमायारा भवेत्ता अभिसेअजलपूअप्पाणो अविग्घेण सग्गं गमिस्सामो, तेसिं णं परिव्वायगाणं णो कप्पइ अगडं वा तलायं वा णइं वाविं वा पुक्खरिणीं वा दीहियं वा गुंजालिअं वा सरं वा (प्र० सरसिं वा) सागरं वा ओगाहित्तए, णण्णत्थ

अब्बाणगमणे, णो कप्पइ सगडं वा जाव संदमाणिअं वा दूरुहत्ताणं गच्छित्तए, तेसिं णं परिव्वायगाणं णो कप्पइ आसं वा हत्थिं वा उट्ठं वा गोणिं वा महिसं वा खरं वा दूरुहत्ताणं गमित्तए, तेसिं णं परिव्वायगाणं णो कप्पइ नडपेच्छाइ वा जाव मागहपेच्छाइ वा पिच्छित्तए, तेसिं परिव्वायगाणं णो कप्पइ हरिआणं लेसणया वा घट्टणया वा थंभणया वा (लूसणया वा पा०) उप्पाडणया वा करित्तए, तेसिं परिव्वायगाणं णो कप्पइ इत्थिकहाइ वा भत्तकहाइ वा देसकहाइ वा रायकहाइ वा चोरकहाइ वा अणत्थदंदं करित्तए, तेसिं णं परिव्वायगाणं णो कप्पइ अयपायाइं वा तउअपायाणि वा तंबपायाणि वा जसदपायाणि वा सीसगपायाणि वा रूपपायाणि वा सुवण्णपायाणि वा अण्णयराणि वा बहुमुल्लाणि धारित्तए णण्णत्थ लाउपाएण वा दारूपाएण वा मट्ठिआपाएण वा, तेसिं णं परिव्वायगाणं णो कप्पइ अयबंधणाणि वा तउअबंधणाणि वा तंबबंधणाणि जाव बहुमुल्लाणि धारित्तए, तेसिं णं परिव्वायगाणं णो कप्पइ णाणाविहवण्णरागत्ताइं वत्थाइं धारित्तए णण्णत्थ एक्काए धाउरत्ताए, तेसिं णं परिव्वायगाणं णो कप्पइ हारं वा अब्धहारं वा एक्कावलिं वा मुत्तावलिं वा कणगावलिं वा रयणावलिं वा मुरविं वा कंठमुरविं वा पालंबं वा तिसरयं वा कडिसुत्तं वा दसमुद्धिआणंतकं वा कडयाणि वा तुडियाणि वा अंगयाणि वा केऊराणि वा कुंडलाणि वा मउडं वा चूलामणिं वा पिणद्धित्तए णण्णत्थ एक्केणं तंबिणं पवित्तएणं, तेसिं णं परिव्वायगाणं णो कप्पइ गंथिमवे ढिमपूरिमसंघातिमे चउव्विहे मल्ले धारित्तए णण्णत्थ एगेणं कण्णपूरेणं, तेसिं णं परिव्वायगाणं णो कप्पइ अगुलएण वा चंदणेण वा कुंकमेण वा गायं अणुलिंपित्तए णण्णत्थ एक्काए गंगामट्ठिआए, तेसिं णं कप्पइ मागहए पत्थए जलस्स पडिगाहित्तए सेऽविय वहमाणे णो चेव णं अवहमाणे सेऽविय थिमिओदए णो चेव णं कद्दमोदए सेऽविय बहुपसण्णे णो चेव णं अबहुपसण्णे सेऽविय परिपूए णो चेव णं अपरिपूए सेऽविय णं दिण्णे नो चेव णं अदिण्णे सेऽविय पिबित्तए णो चेव णं हत्थपायचरूचमसपक्खालणट्ठाए सिणाइत्तए वा, तेसिं णं परिव्वायगाणं कप्पइ मागहए अब्धाढए जलस्स पडिगाहित्तए सेऽविय वहमाणे णो चेव णं अवहमाणे जाव णो चेव णं अदिण्णे, सेऽविय हत्थपायचरूचमसपक्खालणट्ठयाए णो चेव णं पिबित्तए सिणाइत्तए वा, ते णं परिव्वायगा एयारूवेणं विहारेणं विहरमाणा बहूइं वासाइं परियायं पाउणंति ता कालमासे कालं किच्चा उक्कोसेणं बंभलोए कप्पे देवत्ताए उववत्तारो भवन्ति तहिं तेसिं गई तहिं तेसिं ठिई दस सागरोवमाइं ठिई पं०, सेसं तं चेव १२ ।३८। तेणं कालेणं अम्मडस्स परिव्वायगस्स सत्त अंतेवासिसयाइं गिम्हकालसमयंसि जेट्टामूलमासंसि गंगाए महानईए उभओकूलेणं कंपिल्लपुराओ णयराओ पुरिमतालं णयरं संपट्टिया विहाराए, तए णं तेसिं परिव्वायगाणं तीसे अगामियाए छिण्णोवायाए दीहमब्धाए अडवीए कंचि देसंतरमणुपत्ताणं से पुव्वग्गहिए उदए अणुपुव्वेणं परिभुंजमाणे झीणे, तए णं ते परिव्वयया झीणोदगा समाणा तण्हाए पारब्भमाणा २ उदगदातारमपस्समाणा अण्णमण्णं सद्दवेति ता एवं व०-एवं खलु देवाणुप्पिया ! अम्ह इमीसे अगामिआए जाव अडवीए कंचि देसंतरमणुपत्ताणं से उदय जाव झीणे तं सेयं खलु देवाणुप्पिया ! अम्ह इमीसे अगामियाए जाव अडवीए उदगदातारस्स सव्वओ समंता मग्गणगवेसणं करित्तएत्तिकट्ठु अण्णमण्णस्स अंतिए एअमट्ठं पडिसुणंति ता तीसे अगामियाए जाव अडवीए उदगदातारस्स सव्वओ समंता मग्गणगवेसणं करेन्ति ता उदगदातारमलभमाणा दोच्चंपि अण्णमण्णं सद्दवेन्ति ता एवं व०-इह णं देवाणुप्पिया ! उदगदातारो णत्थि तं णो खलु कप्पइ अम्ह अदिण्णं गिण्हित्तए अदिण्णं सातिज्जित्तए तं मा णं अम्हे इयाणिं आवइकालंमिवि अदिण्णं गिण्हामो अदिण्णं सादिज्जामो मा णं अम्हं तवलोवे भविस्सइ, तं सेयं खलु अम्हं देवाणुप्पिया ! तिदंडयं कुंडियाओ य कंचणियाओ य करोडियाओ य भिसियाओ य छण्णालए य अंकुसए य केसरियाओ य पवित्तए य गणेत्तियाओ य छत्तए य वाहणाओ य पाउयाओ य धाउरत्ताओ य एगंते एडित्ता गंगं महाणइं ओगहित्ता वालुअसंथारए संथरित्ता संलेहणाझूसणाझोसियाणं भत्तपाणपडियाइक्खियाणं पाओवगयाणं कालं अणवकंखमाणानं विहरित्तएत्तिकट्ठु अण्णमण्णस्स अंतिए एअमट्ठं पडिसुणंति ता तिदंडए य जाव एगंते एडेइ ता गंगं महाणइं ओगाहेति ता वालुआसंथारए संथरंति वालुयासंथारयं दूरुहिति ता पुरत्थाभिमुहा संपलियं कनिसन्ना करयलजावकट्ठु एवं व०-णमोऽत्थु णं अरहंताणं जाव संपत्ताणं, नमोऽत्थु णं समणस्स भगवओ महावीरस्स जाव संपाविउकामस्स, नमोऽत्थु णं अम्मडस्स परिव्वायगस्स अम्हं धम्मायरियस्स धम्मोवदेसगस्स, पुव्विं णं अम्हे अम्मडस्स परिव्वायगस्स अंतिए थूलगपाणाइवावाए पच्चक्खाए जावज्जीवाए मुसावाए० अदिण्णादाणे पच्चक्खाए

जावज्जीवाए सव्वे मेहुणे पच्चक्खाए जावज्जीवाए थूलए परिग्गहे पच्चक्खाए जावज्जीवाए इयाणिं अम्हे समणस्स भगवओ महावीरस्स अंतिए सव्वं पाणावाइवायं पच्चक्खामो जावज्जीवाए एवं जाव सव्वं परिग्गहं पच्चक्खामो जावज्जीवाए सव्वं कोहं माणं मायं लोहं पेज्जं दोसं कलहं अब्भक्खाणं पेसुण्णं परपरिवायं अरइरइं मायामोसं मिच्छादंसणसल्लं अकरणिज्जं जोगं पच्चक्खामो जावज्जीवाए सव्वं असणं पाणं खाइमं साइमं चउव्विहंपि आहारं पच्चक्खामो जावज्जीवाए जंपिय इमं सरीरं इट्ठं कंतं पियं मणुण्णं मणामं थेज्जं (पेज्जं पा०) वेसासियं संमतं बहुमतं अणुमतं भंडकरंडगसमाणं मा णं सीयं मा णं उण्हं मा णं खुहा मा णं पिवासा मा णं वाला मा णं चोरा मा णं दंसा मा णं मसगा मा णं वातियपित्तियसिंभियसंनिवाइयविविहा रोगातंका परीसहोवसग्गा फुसंतुत्तिकट्ठु एयंपि णं चरमेहिं ऊसासणीसासेहिं वोसिरामत्तिकट्ठु संलेहणाझूसणाझूसिया भत्तपाणपडियाइक्खिया पाओवगया कालं अणवकंखमाणा विहरंति, तए णं ते परिव्वायया बहूइं भत्ताइं अणसणाए छेदेन्ति ता आलोइअपडिक्कंता समाहिपत्ताकालमासे कालं किच्चा बंभलोए कप्पे देवत्ताए उववण्णा, तहिं तेसिं गई दससागरोवमाइं ठिई पं०, परलोगस्स आराहगा, सेसं तं चेव १३ । ३९ । बहुजणे णं भंते ! अण्णमण्णस्स एवमाइक्खइ एवं भासइ एवं पण्णवेइ एवं परूवेइ-एवं खलु अंब (अम्म) डे परिव्वायए कंपिल्लपुरे णयरे घरसते आहारमाहारेइ घरसए वसहिं उवेइ से कहमेयं भंते ! एवं ?, गोयमा ! जण्णं से बहुजणो अण्णमण्णस्स एवमाइक्खइ जाव एवं परूवेइ-एवं खलु अम्मडे परिव्वायए कंपिल्लपुरे जाव घरसए वसहिं उवेइ सच्चे णं एसमट्ठे, अहंपि णं गोयमा ! एवमाइक्खामि जाव एवं परूवेमि-एवं खलु अम्मडे परिव्वायए जाव वसहिं उवेइ, से केणट्ठेणं भंते ! वुच्चइ-अम्मडे परिव्वायए जाव वसहिं उवेइ ? . गोयमा ! अम्मडस्स णं परिव्वायगस्स पगइभइयाए जाव विणीययाए छट्ठंछट्ठेणं अनिक्खित्तेणं तवोकम्मेणं उड्ढं बाहाओ पगिज्झिय २ सूराभिमुहस्स आतावणभूमीए आतावेमाणस्स सुभेणं परिणामेणं पसत्थाहिं लेसाहिं विसुज्झमाणीहिं अन्नया कयाई तदावरणिज्जाणं कम्माणं खओवसमेणं ईहावूहामग्गणगवेसणं करेमाणस्स वीरियलब्धीए वेउव्वियलब्धीए ओहिणाणलब्धी समुप्पण्णा, तए णं से अम्मडे परिव्वायए ताए वीरियलब्धीए वेउव्वियलब्धीए ओहिणाणलब्धीए समुप्पण्णाए जणविम्हावणहेउं कंपिल्लपुरे घरसए जाव वसहिं उवेइ, से तेणट्ठुणं गोयमा ! एवं वुच्चइ-अम्मडे परिव्वायए कंपिल्लपुरे णयरे घरसए जाव वसहिं उवेइ, पहू णं भंते ! अम्मडे परिव्वायए देवाणुप्पियाणं अंतिए मुंडे भवित्ता अगाराओ अणगारियं पव्वइत्तए ?, णो इणट्ठे समट्ठे, गोयमा ! अम्मडे णं परिव्वायए समरोवासाए अभिगयजीवाजीवे जाव अप्पाणं भावेमाणे विहरइ णवरं ऊसियफलिहे अवंगुयदुवारे चियत्तंतेउरघरदारपवेसी (चियत्तघरंतेउरपवेसी पा०) ति ण वुच्चइ, अम्मडस्स णं परिव्वायगस्स थूलए पाणाइवाए पच्चक्खाए जावज्जीवाए जाव परिग्गहे णवरं सव्वे मेहुणे पच्चक्खाए जावज्जीवाए, अम्मडस्स णं णो कप्पइ अक्खसोत्तप्पमाणमेत्तंपि जलं सयराहं उत्तरित्तए णण्णत्थ अब्बाणगमणेणं, अम्मडस्स णं णो कप्पइ सगडं एवं चेव भाणियव्वं जाव णण्णत्थ एगाए गंगामट्ठियाए, अम्मडस्स णं परिव्वायगस्स णो कप्पइ आहाकम्मिए वा उद्देसिए वा मीसजाएइ वा अज्झोअरएइ वा पूइकम्मेइ वा कीयगडेइ वा पामिच्चेइ वा अणिसिट्ठेइ वा अभिहडेइ वा ठइत्तए वा रइत्तए वा कंतारभत्तेइ वा दुब्भिकखभत्तेइ वा पाहुणगभत्तेइ वा गिलाणभत्तेइ वा वदलियाभत्तेइ वा भोत्ताए वा पाइत्तए वा, अम्मडस्स णं परिव्वायगस्स णो कप्पइ मूलभोयणे वा जाव बीयभोयणे वा भोत्तए वा पाइत्तए वा, अम्मडस्स णं परिव्वायगस्स चउव्विहे अणत्थदंडे पच्चक्खाए जावज्जीवाए तं०-अवज्झाणायरिए पमायायरिए हिंसप्पयाणे पावकम्मोवएसे, अम्मडस्स कप्पइ मागहए अब्बाढए जलस्स पडिग्गाहित्तए सेऽविय बहुमाणए नो चेव णं अवहमाणए जाव सेऽविय परिपूए नो चेव णं अपरिपूए सेऽविय सावज्जेत्तिकाउं णो चेव णं अणवज्जे सेऽविय जीवा इतिकट्ठु णो चेव णं अजीवा सेऽविय दिण्णे णो चेव णं अदिण्णे सेऽविय दंतहत्थपायचरूचमसपक्खालणट्ठयाए पिबित्तए वा णो चेव णं सिणाइत्तए, अम्मडस्स कप्पइ मागहए य आढए जलस्स पडिग्गाहित्तए सेऽविय वहमाणे जाव दिन्ने नो चेव णं अदिण्णे सेऽविय सिणाइत्तए णो चेव णं हत्थपायचरूचमसपक्खालणट्ठयाए पिबित्तए वा, अम्मडस्स णो कप्पइ अन्नउत्थिया वा अण्णउत्थियदेवयाणि वा अण्णउत्थियपरिग्गहियाणि वा चेइयाइं वंदित्तए वा णमंसित्तए वा जाव पज्जुवासित्तए वा णण्णत्थ अरिहंते वा अरिहंतचेइयाइं वा, अम्मडे णं भंते ! परिव्वायए कालमासे कालं किच्चा कहिं गच्छिहिति कहिं उववज्जिहिति ?, गोयमा ! अम्मडे णं परिव्वायए उच्चावएहिं

सीलव्वयगुणवेरमणपच्चक्खाणपोसहोववासेहिं अप्पाणं भावेमाणे बहूइं वासाइं समणोवासयपरियायं पाउणिहिति त्ता मासियाए संलेहणाए अप्पाणं झूसित्ता सट्ठिं भत्ताइं अणसणाए छेदित्ता आलोइयपडिक्कंते समाहिपत्ते कालमासे कालं किच्चा बंभलोए कप्पे देवत्ताए उववज्जिहिति, तत्थ णं अत्थेगइयाणं देवाणं दस सागरोवमाइं ठिई पं०, तत्थ णं अम्मडस्सवि देवस्स दस सागरोवमाइं ठिई, से णं भंते ! अम्मडे देवे ताओ देवलोगाओ आउक्खएणं भवक्खएणं ठिइक्खएणं अणंतरं चयं चइत्ता कहिं गच्छिहिति कहिं उवज्जिहिति ?, गोयमा ! महाविदेहे वासे जाइं इमाइं कुलाइं भवन्ति तं०-अड्ढाइं दित्ताइं वित्ताइं विच्छिण्णविउलभवणसयणासणजाणवाहणा (इण्णा) इं बहुधणजायरूवरययाइं आओगपओगसंपउत्ताइं विच्छिड्डियपउरभत्तपाणाइं बहुदासीदासगोमहिसगवेलगप्पभूयाइं बहुजणस्स अपरिभूयाइं तहप्पगारेसु कुलेसु पुमत्ताए पच्चायाहिति, तए णं तस्स दारगस्स गब्भत्थस्स चेव समाणस्स अम्मापिईणं धम्मे दढा पइण्णा भविस्सइ से णं तत्थ णवणं मासाणं बहुपडिपुण्णाणं अब्बट्टमाण राइंदियाणं वीइक्कंताणं सुकुमालपाणिपाए जाव ससिसोमाकारे कंते पियदंसणे सुरूवे दारए पयाहिति, तए णं तस्स दारगस्स अम्मापियरो पढमे दिवसे ठिइवडियं काहिंति बिइयदिवसे चंदासूरदंसणियं काहिंति छट्ठे दिवसे जागरियं काहिंति एक्कारसमे दिवसे वीतिकंते णिव्वित्ते असुइजायकम्मकरणे संपत्ते बारसाहे दिवसे अम्मापियरो इमं एयारूवं गोण्णं गुणाणप्फण्णं णामधेज्जं काहिंति-जम्हा णं अम्हे इमंसि दारगंसि गब्भत्थंसि चेव समाणंसि धम्मे दढा पइण्णा तं होउ णं अम्हं दारए दढपइण्णे णामेणं, तए णं तस्स दारगस्स अम्मापियरो णामधेज्जं करेहिंति दढपइण्णेति, तं दढपइण्णं दारगं अम्मापियरो साइरेगड्डुवासजातगं जाणित्ता सोभणंसि तिहिकरणणक्खत्तमुहुत्तंसि कलायरियस्स उवणेहिंति, तए णं से कलायरिए तं दढपइण्णं दारगं लेहाइयाओ गणियप्पहाणाओ सउणरूयपज्जवसाणाओ बावत्तरिं कलाओ सुत्ततो य अत्थतो य करणतो य सेहाविहिति सिक्खाविहिति, तं०-लेहं गणितं रूयं णट्ठं गीयं वाइयं सरगयं पुक्खरगयं समतालंजूयं जणवायं पासकं अट्ठावयं पोरेकच्चं दगमट्ठियं अण्णविहिं पाणविहिं वत्थविहिं १८ विलेवणविहिं सयणविहिं अज्जं पहेलियं मागहिअं गाहं गीइयं सिलोयं हिरण्णजुत्ती सुवण्णजुत्ती गंधजुत्ती चुण्णजुत्ती आभरणविहिं तरूणीपडिकम्मं इत्थिलक्खणं पुरिसलक्खणं हयलक्खणं गयलक्खणं ३६ गोणलक्खणं कुक्कुडलक्खणं चक्कलक्खणं छत्तलक्खणं चम्मलक्खणं दंडलक्खणं असिलक्खणं मणिलक्खणं काकणिलक्खणं वत्थुविज्जं खंधारमाणं नगरमाणं वत्थुनिवेसणं वूहं पडिवूहं चारं पडिचारंचक्कवूहं ५४ गरूलवूहं सगडवूहं जुद्धनिजुद्धं जुद्धातिजुद्धं मुट्ठिजुद्धं बाहुजुद्धं लयाजुद्धं इसत्थं छरूप्पवाहं धणुव्वेयं हिरण्णपागं सुवण्णपागं वट्ठखेइडं णालियाखेइडं पत्तच्छेज्जं कडव (ग) च्छेज्जं सज्जीवं निज्जीवं सउणरूत ७२ मिति बावत्तरिं कला सेहाविति० अम्मापिईणं उवणेहिंति, तए णं तस्स दढपइण्णस्स दारगस्स अम्मापियरो तं कलायरिअं विपुलेणं असणपाणखाइमसाइमेणं वत्थगंधमल्लालंकारेण य सक्कारेहिंति सम्माणेहिंति विपुलं जीवियारिहं पीइदाणं दलिस्सन्ति त्ता पडिविसज्जेहिंति, तए णं से दढपइण्णे दारए बावत्तरिकलापंडिए नवंगसुत्तपडिबोहिए अट्टारसदेसीभासाविसारए गीयरतीगंधव्वणट्टकुसले हयजोही गयजोही रहजोही बाहुजोही बाहुप्पमद्दी बियालचारी साहसिए अलंभोगसमत्थे आवि भविस्सइ, तए णं तं दढपइण्णं दारगं अम्मापियरो बावत्तरिकलापंडियं जाव अलंभोगसमत्थं वियाणित्ता विउलेहिं अण्णभोगेहिं पाणभोगेहिं लेणभोगेहिं वत्थभोगेहिं सयणभोगेहिं कामभोगेहिं उवणिमंतेहिंति, तए णं से दढपइण्णे दारए तेहिं विउलेहिं अण्णभोगेहिं जाव सयणभोगेहिं णो सज्जिहिति णो रज्जिहिति णो गिज्झिहिति णो अज्झोववज्जिहिति, से जहाणामए उप्पलेइवा पउमेइ वा कुसुमेइ वा नलिणेइ वा सुभगेइ वा सुगंधेइ वा पोंडरीएइ वा महापोंडरीएइ वा सतपत्तेइ वा सहस्सपत्तेइ वा सतसहस्सपत्तेइ वा पंके जाए जले संवुड्ढे णोवलिप्पइ पंकरणं णोवलिप्पइ जलरणं एवमेव दढपइण्णेवि दारए कामेहिं जाए भोगेहिं संवुड्ढे णोवलिप्पिहिति कामरणं णोवलिप्पिहिति भोगरणं णोवलिप्पिहिति मित्तणाइणियगसयणसंबंधिपरिजणेणं से णं तहारूवाणं थेराणं अंतिए केवलं बोहिं बुज्झिहिति त्ता अगाराओ अणगारियं पव्वइहिति, से णं भविस्सइ अणगारे भगवंते ईरियासमिए जाव गुत्तबंभयारी, तस्स णं भगवंतस्स एतेणं विहारेणं विहरमाणस्स अणंते अणुत्तरे णिव्वाघाए निरावरणे कसिणे पडिपुण्णे केवलवरणाणदंसणे समुप्पज्जिहिति तए णं से दढपइण्णे केवली बहूइं वासाइं केवलपरियागं पाउणिहिति त्ता मासियाए संलेहणाए अप्पाणं झूसित्ता सट्ठिं भत्ताइं अणसणाए छेत्ता जस्सट्टाए कीरइ णग्गभावे मुंडभावे

अण्हाणए अदंतवणए केसलोए बंभचेरवासे अच्छत्तकं अणोवाहणकं भूमिसेज्जा फलहसेज्जा कट्ठसेज्जा परघरपवेसी लद्धावलद्धं परेहिं हीलणाओ खिंसणाओ णिंदणाओ गरहणाओ तालणाओ तज्जणाओ परिभवणाओ पव्वहणाओ उच्चावया गामकंटका वावीसं परीसहोवसग्गा अहियासिज्जंति तमट्ठमारहिता चरिमेहिं उस्सासणिस्सासेहिं सिज्झिंहिति बुज्झिंहिति मुच्चिंहिति परिणिव्वाहिति सव्वदुक्खाणमंतं करेहिं १४ । १४० । से इमे गामागरजावसण्णिवेसेसु पव्वइया समणा भवंति, तं०-आयरियपडिणीया उवज्झायपडिणीया कुलपडिणीया गणपडिणीया आयरियउवज्झायाणं अयसकारगा अवण्णकारगा अकित्तिकारगा बहूहिं असम्भावुम्भावणाहिं मिच्छत्ताभिणिवेसेहि य अप्पाणं च परं च तदुभयं च वुग्गाहेमाणा वुप्पाएमाणा विहरिता बहुइं वासाइं सामण्णपरियागं पाउणंति ता तस्स ठाणस्स अणालोइयअपडिक्कंता कालमासे कालं किच्चा उक्कोसेणं लंतए कप्पे देवकिब्बिएसु देवकिब्बिसियत्ताए उववत्तारो भवंति, तहिं तेसिं गती तेरससागरोवमाइं ठिती अणाहारगा सेसं तं चेव १५ । से जे इमे सण्णिपंचिंदियतिरिक्खजोणिया पज्जत्तया भवंति, तं०-जलयरा खहयरा थलयरा, तेणिं अत्थेगइयाणं सुभेणं परिणामेणं पसत्थेहिं अज्झवसाणेहिं लेसाहिं विसुज्झमाणीहिं तयावरणिज्जाणं कम्माणं खओवसमेणं ईहावूमग्गणगवेसणं करेमाणाणं सण्णीपुव्वजाईसरणे समुप्पज्जइ, तए णं ते समुप्पण्णजाईसरा समाणा सयमेव पंचाणुव्वयाइं पडिवज्जंति ता बहूहिं सीलव्वयगुणवेरमणपच्चक्खाणपोसहोववासेहिं अप्पाणं भावेमाणा बहुइं वासाइं आउयं पालेंति ता भत्तं पच्चक्खंति बहुइं भत्ताइं अणसणाए छेयंति ता आलोइयपडिक्कंता समाहिपंतता कालमासे कालं किच्चा उक्कोसेणं सहस्सारे कप्पे देवत्ताए उववत्तारो भवंति, तहिं तेसिं गती अट्टारस सागरेवमाइं ठिती पं० परलोगस्स आराहगा सेसं तं चेव १६ । से जे इमे गामागरजावसंनिवेसेसु आजीविका भवंति, तं०-दुघरंतरिया तिघरंतरिया सत्तघरंतरिया उप्पलबेंटिया घरसमुदाणिया विज्जुअंतरिया उट्ठिया समणा ते णं एयारू वेणं विहारेणं विहरमाणा बहुइं वासाइं परियायं पाउणित्ता कालमासे कालं किच्चा उक्कोसेणं अच्चुए कप्पे देवत्ताए उववत्तारो भवंति, तहिं तेसिं गती बावीसं सागरोवमाइं ठिती अणाराहगा सेसं तं चेव १७ । से जे इमे गामागरजावसण्णिवेसेसु पव्वइया समणा भवंति तं०-अत्तुक्कोसिया परपरिवाइया भूइकम्मिया भुज्जो २ कोउयकारका ते णं एयारूवेणं विहारेणं विहरमाणा बहुइं वासाइं सामण्णपरियागं पाउणंति ता तस्स ठाणस्स अणालोइयअपडिक्कंता कालमासे कालं किच्चा उक्कोसेणं अच्चुए कप्पे आभिओगिएसु देवेसु देवत्ताए उववत्तारो भवंति तहिं तेसिं गई बावीसं सागरोवमाइं ठिई परलोगस्स अणाराहगा सेसं तं चेव १८ । से जे इमे गामागरजावसण्णिवेसेसु णिणहगा भवंति तं०-बहुरया जीवपएसिया अव्वत्तिया सामुच्छेया दोकिरिया तेरासिया अबद्धिया इच्चेते सत्त पवयणणिणहगा केवलचरिया लिंगसामण्णा मिच्छद्दिट्ठी बहूहिं असम्भावुम्भावणाहिं मिच्छत्ताभिणिवेसेहि य अप्पाणं च परं च तदुभयं च वुग्गाहेमाणा वुप्पाएमाणा विहरिता बहुइं वासाइं सामण्णपरियागं पाउणंति ता कालमासे कालं किच्चा उक्कोसेणं उवरिमेसु गेवेजेसु देवत्ताए उववत्तारो भवंति तहिं तेसिं गती एकत्तीसं सागरोवमाइं ठिती परलोगस्स अणाराहगा ससें तं चेव १९ । से जे इमे गामागरजावसण्णिवेसेसु मणुया भवंति तं०-अप्पारंभा अप्पपरिग्गहा धम्मिया धम्माणुया धम्मिद्धा धम्मक्खाई धम्मप्पलोइया धम्मपलज्जाणा धम्मसमुदायारा धम्मेणं चेव वित्तिं कप्पेमाणा सुसीला सुव्वया सुप्पडियाणंदा साहूहिं एकच्चाओ पाणाइवायाओ पडिविरया जावज्जीवाए एकच्चाओ (एगइयाओ पा०) अपडिविरया एवं जाव परिग्गहाओ एकच्चाओ कोहाओ माणाओ मायाओ लोहाओ पेज्जाओ कलहाओ अब्भक्खाणाओ पेसुण्णाओ परपरिवायाओ अरतिरतीओ मायामोसाओ मिच्छादंसणसल्लाओ पडिविरिया जावज्जीवाए एकच्चाओ अपडिविरया एकच्चाओ आरंभसमारंभाओ पडिविरिया जावज्जीवाए एकच्चाओ अपडिविरया एकच्चाओ करणकारावणाओ पडिविरिया जावज्जीवाए एकच्चाओ अपडिविरया एगच्चाओ पयणपयावणाओ पडिविरिया जावज्जीवाए एकच्चाओ पयणपयावणाओ अपडिविरया एकच्चाओ कोट्टणपिट्तज्जणतालणवहबंधपरिकिलेसाओ पडिविरिया जावज्जीवाए एकच्चाओ अपडिविरया एकच्चाओ ण्हाणुम्महणवण्णगविलेवणसद्धफरिसरसरूव गंधमल्लालंकाराओ पडिविरिया जावज्जीवाए एकच्चाओ अपडिविरया जे यावण्णे तहप्पगारा सावज्जजोगोवहिया कम्मंता (सावज्जा अबोहिया पा०) परपाणपरियावणकरा कज्जंति तओ जाव एकच्चाओ अपडिविरया तं०- (से जहानामए पा०)समणोवासगा भवंति अभिगयजीवाजीवा उवलद्धपुण्णपावा

आसवसंवरनिज्जरकिरियाअहिगरणबंधमोक्खकुसला असहेज्जा देवासुरणागजक्खरक्खसकिन्नरकिंपुरिसगरुलंगंधव्वमहोरगाइएहिं देवगणेहिं निगंथाओ पावयणाओ अणइक्कमणिज्जा णिगंथे पावयणे णिस्संकिया णिक्खंखिया निव्वितिगिच्छा लब्धाट्ठा गहियट्ठा पुच्छियट्ठा अभिगयट्ठा विणिच्छियट्ठा अट्ठिमिजपेम्माणुरागरत्ता अयमाउसो ! णिगंथे पावयणे अट्ठे अयं परमट्ठे सेसे अणट्ठे ऊसियफलिहा अवंगुयदुवारा चियत्तंतेउरपरघरदारप्पवेसा चउदसट्ठमुट्ठिपुण्णमासिणीसु पडिपुण्णं पोसहं सम्मं अणुपा-लित्ता समणे णिगंथे फासएसणिज्जेणं असणपाणखाइमसाइमेणं वत्थपडिग्गहकंबलपायपुंछणेणं ओसहभेसज्जेणं पडिहारिएण य पीढफलगसेज्जासंधारणं पडिलाभेमाणा विहरंति ता भत्तं पच्चक्खंति ते बहूइं भत्ताइं अणसणाए छेदिंति ता आलोइयपडिक्कंता समाहिपत्ता कालमासे कालं किच्चा उक्कोसेणं अच्चे कप्पे देवत्ताए उववत्तारो भवंति, तेहिं तेसिं गई बावीसं सागरोवमाइं ठिई आराहया सेसं तहेव २० । से जे इमे गामागरजावसणिवेसेसु (१४२) मणुआ भवंति, तं०- अणारंभा अपरिग्गहा धम्मया जाव कप्पेमाणा सुसीला सुव्वया सुपडियाणंदा साहू सव्वाओ पाणाइवाआओ पडिविरया जाव सव्वाओ परिग्गहाओ पडिविरया सव्वाओ कोहाओ माणाओ मायाओ लोभाओ जाव मिच्छादंसणसल्लाओ० पडिविरया सव्वाओ आरंभसमारंभाओ पडिविरया सव्वाओ करणकारावणाओ पडिविरया सव्वाओ पयणपयावणाओ पडिविरया सव्वाओ कुट्टणपिट्टणतज्जणतालणवहबंधपरिकिलेसाओ पडिविरया सव्वाओ ण्हाणुम्मट्ठणवण्णगविलेवणसद्धपरिसरसख्वगंधमल्लालंकाराओ पडिविरया जे यावण्णे तहप्पगारा सावज्जजोगोवहिया कम्मंता परपाणपरियावणकरा कज्जंति तओवि पडिविरया जावज्जीवाए से जहाणामए अणगारा भवंति- ईरियासमिया भासासमिया जाव इणमेव णिगंथं पावयणं पुरओकाउं विहरंति तेसिं णं भगवंताणं एणं विहारेणं विहरमाणं अत्थेगइयाणं अणंते जाव केवलवरणाणदसंणे समुप्पज्जइ, ते बहूइं वासाइं केवलपरियागं पाउणंति जाव पाउणित्ता भत्तं पच्चक्खंति ता बहूइं भत्ताइं अणसणाए छेदेन्ति ता जस्सट्ठाए कीरइ णग्गभावे० अंतं करंति, जेसिंपि य णं एगइयाणं णो केवलवरणाणदसंणे समुप्पज्जइ ते बहूइं वासाइं छउमत्थपरियागं पाउणन्ति ता आबाहे उप्पण्णे वा अणुप्पण्णे वा भत्तं पच्चक्खंति, ते बहूइं भत्ताइं अणसणाए छेदेन्ति ता जस्सट्ठाए कीरइ णग्गभावे जाव तमट्ठमाराहित्ता चरिमेहिं ऊसासणीसासेहिं अणंतं अणुत्तरं निव्वाघायं निरावरणं कसिणं पडिपुण्णं केवलवरणाणदसंणं उप्पाडिंति, तओ पच्छा सिज्झिहिन्ति जाव अंतं करेहिन्ति, एगच्चा पुण एगे भयंतारो पुव्वकम्मावसेसेणं कालमासे कालं किच्चा उक्कोसेणं सव्वट्ठसिद्धे महाविमाणे देवत्ताए उववत्तारो भवंति, तहिं तेसिं गई तेत्तीसं सागरोवमाइं ठिई आराहया सेसं तं चेव २१ । से जे इमे गामागरजावसणिवेसेसु मणुआ भवंति तं०- सव्वकामविरया सव्वरागविरया सव्वसंगातीता सव्वसिणेहातिक्कंता अक्कोहा णिक्कोहा खीणक्कोहा एवं माणमायालोहा अणुपुव्वेणं अट्ठकम्मपयडीओ खवेत्ता उप्पिं लोयग्गपइट्ठाणा हवंति । ४१। अणगारे णं भंते ! भाविअप्पा केवलिसमुग्घाएणं समोहणित्ता केवलकप्पं लोयं फुसित्ताणं चिट्ठइ ?, हंता चिट्ठइ, से णूणं भंते ! केवलकप्पे लोए तेहिं णिज्जरापोग्गलेहिं फुडे ?, हंता फुडे, छउमत्थे णं भंते ! मणुस्से तेसिं णिज्जरापोग्गलाणं किंचि वण्णेणं वण्णं गंधेणं गंधं रसेणं रसं फासेणं फासं जाणइ पासइ ?, गोयमा ! णो इणट्ठे समट्ठे, केणट्ठेणं भंते ! एवं वुच्चइ- छउमत्थे णं मणुस्से तेसिं णिज्जरापोग्गलाणं णो किंचि वण्णेणं वण्णं जाव जाणइ पासइ ?, गोयमा ! अयं णं जंबुदीवे दीवे सव्वदीवसमुद्धानं सव्वब्भंतरए सव्वखुड्डाए वट्ठे तेल्लापूयसंठाणसंठिए वट्ठे रहचक्कवालसंठाणसंठिए वट्ठे पुक्खरकणियासंठाणसंठिए वट्ठे पडिपुण्णचंदसंठाणसंठिए एक्कं जोयणसयसहस्सं आयामविक्खंभेणं तिण्णि जोयणसयसहस्साइं सोलस सहस्साइं दोण्णि य सत्तावीसे जोयणसए तिण्णि य कोसे अट्ठावीसं च धणुसयं तेरस य अंगुलाइं अब्बंगुलियं च किंचिविसेसाहिए परिक्खेवेणं पं०, देवे णं महिड्डीए महजुइए महब्बले महाजसे महासुक्खे महाणुभावे सविलेवणं गंधसमुग्गयं गिण्हइ ता तं अवदालेइ ता जाव इ णमेवत्तिकट्ठु केवलकप्पं जंबुदीवं दीवं तीहिं अच्छराणिवाएहिं तिसत्तखुत्तो अणुपरिअट्ठित्ताणं हव्वमागच्छेज्जा से णूणं गोयमा ! से केवलकप्पे जंबुदीवे दीवे तेहिं घाणपोग्गलेहिं फुडे ?, हंता फुडे, छउमत्थे णं गोयमा ! मणुस्से तेसिं घाणपोग्गलाणं किंचि वण्णेणं वण्णं जाव जाणति पासति ?, भगवं णो इणट्ठे समट्ठे, से तेणट्ठेणं गोयमा ! एवं वुच्चइ- छउमत्थे णं मणुस्से तेसिं णिज्जरापोग्गलाणं नो किंचि वण्णेणं वण्णं जाव जाणइ पासइ, एसुहुमा णं ते पोग्गला पं० समणाउसो ! सव्वलोयंपिय णं ते फुसित्ताणं चिट्ठंति, कम्हा णं भंते ! केवली समोहणंति कम्हा णं भंते ! केवली समुग्घायं गच्छंति ?, गोयमा ! केवलीणं चत्तारि

कम्मंसा अपलिकखीणा (अवेइया अनिज्जिण्णा पा०) भवन्ति तं०- वेयणिज्जं आउयं णामं गुत्तं, सव्वबहुए से वेयणिज्जे कम्मे भवइ सव्वत्थोवे से आउए कम्मे भवइ, विसमं समं करेइ बंधणेहिं ठिईहि य विसमसमकरणयाए बंधणेहिं ठिईहि य एवं खलु केवली समोहणंति एवं खलुं केवली समुग्घायं गच्छंति, सव्वेवि णं भन्ते ! केवली समुग्घायं गच्छंति ? णोइणट्ठे समट्ठे, 'अकिच्चाणं समुग्घायं अणंता केवली जिणा । जरामरणविप्पमुक्का, सिद्धिं वरगइं गया ॥८॥ कइसमए णं भन्ते ! आउज्जीकरणे पं० ? गोयमा ! असंखेज्जसमइए अंतोमुहुत्तिए पं०, केवलिसमुग्घाए णं भन्ते ! कइसमइए पं० ? गोयमा ! अट्ठसमइए पं० तं०- पढमे समए दंडं करेइ बिइए समए कवाडं करेइ तईए समए मंथं करेइ चउत्थे समए लोयं पूरेइ पंचमे समए लोयं पडिसाहरइ छट्ठे समए मंथं पडिसाहरइ, सत्तमे समए कवाडं पडिसाहरइ अट्ठमे समए दंडं पडिसाहरइ ता तओ पच्छा सरीरत्थे भवइ, से णं भन्ते ! तहा समुग्घायं गए किं मणजोगं जुंजइ वयजोगं जुंजइ कायजोगं जुंजइ ? गोयमा ! णो मणजोगं जुंजइ णो वयजोगं जुंजइ कायजोगं जुंजइ, कायजोगं जुंजमाणे किं ओरालियसरीरकायजोगं जुंजइ ओरालियमिस्स० वेउव्वियसरीरकायजोगं जुंजइ वेउव्वियमिस्ससरीरकायजोगं जुंजइ आहारसरीरकायजोगं जुंजइ आहारसरीरमिस्सकायजोगं जुंजइ कम्मा० ? गोयमा ! ओरालियसरीरकायजोगं जुंजइ ओरालियमिस्ससरीरकायजोगंपि जुंजइ णो वेउव्विय० णो वेउव्वियमिस्स० णो आहारग० णो आहारगमिस्स० कम्मसरीरकायजोगंपि जुंजइ, पढमट्ठमेसु समएसु ओरालियसरीरकायजोगं जुंजइ बिइयछट्ठसत्तमेसु समएसु ओरालियमिस्ससरीरकायजोगं जुंजइ तईयचउत्थपंचमेहिं कम्मासरीरकायजोगं जुंजइ, से णं भन्ते ! तहा समुग्घायगए सिज्झिहिइ वुज्झिहिइ मुच्चिहिइ परिनिव्वाहिइ सव्वदुक्खाणमंतं करेहिइ ?, णो इणट्ठे समट्ठे, सेणं तओ पडिनियत्तइ ता इहमागच्छइ ता तओ पच्छा मणजोगंपि जुंजइ वयजोगंपि जुंजइ कायजोगंपि जुंजइ, मणजोगं जुंजमाणे किं सच्चमणजोगं जुंजइ मोस० सच्चामोस० असच्चामोस० ?, गोयमा ! सच्चमणजोगं जुंजइ णो मोस० णो सच्चामोस० असच्चामोसमणजोगंपि जुंजइ, वयजोगं जुंजमाणे किं सच्चवइजोगं जुंजइ मोस० किं सच्चामोस० असच्चामोस० ? गोयमा ! सच्चवइजोगं जुंजइ णो मोस० णो सच्चामोस० असच्चामोसवइजोगंपि जुंजइ, कायजोगं जुंजमाणे आगच्छेज्ज वा चिट्ठेज्ज वा णिसीएज्ज वा तुयट्ठेज्ज वा उल्लंघेज्ज वा पलंघेज्ज वा उक्खेवणं वा अवक्खेवणं वा तिरियक्खेवणं वा करेज्जा पाडिहारियं वा पीढफलगसेज्जसंथारगं पच्चप्पिणेज्जा । ४२ । से णं भन्ते ! तहा सजोगी सिज्झिहिइ जाव अंतं करेहिइ ?, णो इणट्ठे समट्ठे, से णं पुव्वामेव सण्णिस्स पंचिंदियस्स पज्जत्तगस्स जहण्णजोगस्स हेट्ठा असंखेज्जगुणपरिहीणं पढमं मणजोगं निरुंभइ तयाणंतरं च णं बिंदियस्स पज्जत्तगस्स जहण्णजोगस्स हेट्ठा असंखेज्जगुणपरिहीणं बिइयं वइजोगं निरुंभइ तयाणंतरं च णं सुहुममस्स पणगजीवस्स अपज्जत्तगस्स जहण्णजोगस्स हेट्ठा असंखेज्जगुणपरिहीणं तईयं कायजोगं णिरुंभइ, से णं एएणं उवाएणं पढमं मणजोगं णिरुंभइ ता वयजोगं णिरुंभइ ता कायजोगं णिरुंभइ ता जोगनिरोहं करेइ ता अजोगत्तं पाउणति ता इसिंहस्सपंचक्खरउच्चारणद्धाए असंखेज्जसमइमं अंतोमुहुत्तियं सेलेसिं पडिवज्जइ पुव्वरइयगुणसेढीयं च णं कम्मं तीसे सेलेसिमद्धाए असंखेज्जाहिं गुणसेढीहिं अणंते कम्मंसे खवेति वेयणिज्जाउयणामगुत्ते इच्चेते चत्तारि कम्मंसे जुगवं खवेइ ता ओरालियतेयाकम्माइं सव्वाहिं विप्पजहणाहिं विप्पजहइ ता उज्जुसेढीपडिवन्ने अफुसमाणगई उड्ढं एक्कसमएणं अविग्गहेणं गंता सागारोवउत्ते सिज्झिहिइ, ते णं तत्थ सिद्धा हवन्ति सादीया अपज्जवसिया असरीरा जीवघणा दंसणनाणोवउत्ता निट्ठियट्ठा निरेयणा नीरया णिम्मला वितिमिरा विसुद्धा सासयमणागयद्धं कालं चिट्ठंति, से केणट्ठेणं भन्ते ! एवं वुच्चइ- ते णं तत्थ सिद्धा भवन्ति सादीया अपज्जवसिया जाव चिट्ठंति ?, गोयमा ! से जहाणामए बीयाणं अग्निदइढाणं पुणरवि अंकुरुप्पत्ती ण भवइ एवामेव सिद्धाणं कम्मबीए दइढे पुणरवि जम्मुप्पत्ती न भवइ से तेणट्ठेणं गोयमा ! एवं वुच्चइ- ते णं तत्थ सिद्धा हवन्ति सादीया अपज्जवसिया जाव चिट्ठंति, जीवा णं भन्ते ! सिज्झमाणा कयरंमि संघयणे सिज्झंति ? गोयमा ! वइरोसभणायसंघयणे सिज्झंति, जीवा णं भन्ते ! सिज्झमाणा कयरंमि संठाणे सिज्झंति ? गोयमा ! छण्हं संठाणाणं अण्णतरे संठाणे सिज्झंति, जीवा णं भन्ते ! सिज्झमाणा कयरंमि उच्चते सिज्झंति ?, गोयमा ! जहण्णेणं सत्तरयणीओ उक्कोसेणं पंचधणुस्सए सिज्झंति, जीवा णं भन्ते ! सिज्झमाणा कयरंमि आउए सिज्झंति ?, गोयमा ! जहण्णेणं साइरेगट्ठवासाउए उक्कोसेणं पुव्वकोडियाउए सिज्झंति, अत्थि णं भन्ते ! इमीसे रयणप्पहाए पुढवीए अहे सिद्धा परिवसंति ? णो इणट्ठे समट्ठे, एवं जाव अहेसत्तमाए, अत्थि णं भन्ते ! सोहम्मस्स कप्पस्स अहे सिद्धा परिवसंति ?, णो इणट्ठे समट्ठे, एवं सव्वेसिं पुच्छा, ईसाणस्स सणंकुमारस्स जाव अच्चुयस्स गेविज्जविमाणानं अणुत्तरविमाणानं, अत्थि णं भन्ते ! ईसीपब्भाराए पुढवीए अहे सिद्धा परिवसंति ?, णो इणट्ठे समट्ठे, से

कहिं खाइ णं भंते ! सिद्धा परिवसंति ?, गोयमा ! इमीसे रयणप्पहाए पुढवीए बहुसमरमणिज्जाओ भूमिभागाओ उड्ढं चदिमसूरियग्गहगणणक्खत्तताराभव(ग)णाओ बहूइं जोयणसयाइं बहूइं जोयणसहस्साइं बहूइं जोयणसयसहस्साइं बहूओ जोयणकोडीओ बहूओ जोयणकोडाकोडीओ उड्ढतरं उप्पइत्ता सोहम्मीसाणसणं कु मारमाहिंदबंभलंतगमहासुक्कसहस्सारआणयणपाणय- आरणचुय तिण्णि य अट्टारे गेविज्जविमाणावाससए वीइवइत्ता विजयवेजयंतजयंतअपराजियसव्वट्टसिद्धस्स य महाविमाणस्स सव्वउवरिल्लाओ थूभियग्गाओ दुवालसजोयणाइं अबाहाए एत्थ णं ईसीपब्भारा णामं पुढवी पं० पणयालीसं जोयणसयसहस्साइं आयाविक्खंभेणं एगा जोयणकोडी बायालीसं सयसहस्साइं तीसं च सहसाइं दोण्णि य अउणापण्णे जोयणसए किंचिविसेसाहिए परिरएणं, ईसिपब्भाराए णं पुढवीए बहुमज्झदेसभाए अट्टजोयणिए खेत्ते अट्टजोयणाइं बाहल्लेणं तयाऽणंतरं च णं मायाए परिहायमाणी २ सव्वेसु चरिमपेरंतेसु मच्छियपत्ताओ तणुयतरा अंगुलस्स असंखेज्जइभागं बाहल्लेणं पं०, ईसीपब्भाराए णं पुढवीए दुवालस णामधेज्जा पं० तं०- ईसीइ वा ईसीपब्भाराइ वा तणूइ वा तणूतणूइ वा सिद्धीइ वा सिद्धालएइ वा मुत्तीइ वा मुत्तालएइ वा लोयग्गेइ वा लोयग्गथूभियाइ वा लोयग्गपडि(बु)ज्झणाइ वा सव्वपाणभूयजीवसत्तसुहावहाइ वा, ईसीपब्भारा णं पुढवी सेया संखतल(आयंसतल पा०)विमलसोल्लियमुणालदगरयतुसारगोक्खीहारवण्णा उत्ताणयच्छत्तसंठाणसंठिया सव्वज्जुणसुवण्णमई अच्छा सण्हा लण्हा घट्ठा मट्ठा णीरया णिम्मला णिप्पंका णिक्कं कडच्छाया समरीचिया सुप्पभा पासादीया दरिसणिज्जा अभिरूवा पडिरूवा, ईसीपब्भाराए णं पुढवीए सीयाए जोयणंमि लोगंते तस्स जोयणस्स जे से उवरिल्ले गाउए तस्स णं गाउअस्स जे से उवल्लि छभागिए तत्थ णं सिद्धा भगवंतो सादीया अपज्जवसिया अणेगजाइजरामरणजोणिवेयणसंसारकलंकलीभावपुणब्भवगब्भवासवसहीपवंचसमइक्कंता सासय मणागयमद्धं चिट्ठंति । ४३ । गाथा- ‘कहिं पडिहया सिद्धा ?, कहिं सिद्धा पडिट्ठिया । कहिं बोदिं चइत्ताणं, कत्थ गंतूण सिज्झई ? ॥ अलोगे पडिहया सिद्धा, लोयग्गे य पडिट्ठिया । इहं बोदिं चइत्ताणं, तत्थ गंतूण सिज्झइ ॥ १० । जं संठाणं तु इहं भवं चयंतस्स चरिमसमयंमि । आसी य पएसघणं तं संठाणं तहिं तस्स ॥ ११ ॥ दीहं वा हस्सं वा जं चरिमभवे हवेज्जसंठाणं । ततो तिभागहीणं सिद्धाणोगाहणा भणिया ॥ १२ ॥ तिण्णि सया तेत्तीसा धणूतिभागो य होइ बोद्धवा । एसा खलु सिद्धाणं उक्कोसोगाहणा भणिया ॥ १३ ॥ चत्तारि य रयणीओ रयणि तिभागूणिया य बोद्धवा । एसा खलु सिद्धाणं मज्झिम ओगाहणा भणिया ॥ १४ ॥ एकाय होइ रयणी साहीया अंगुलाइं अट्ट भवे । एसा खलु सिद्धाणं जहण्ण ओगाहणा भणिया ॥ १५ ॥ ओगाहणाए सिद्धा भवत्तिभागेण होन्ति परिहीणा । संठाणमणित्थं जरामरणविप्पमुक्काणं ॥ १६ ॥ जत्थ य एगो सिद्धो तत्थ अणंता भवक्खयविमुक्का । अण्णोऽण्णसमवगाढा पुट्ठा सव्वे य लोगंते ॥ १७ ॥ फुसइ अणंते सिद्धे सव्वपएसेहिं णियमसो सिद्धो । तेवि असंखेज्जगुणा देसपएसेहिं जे पुट्ठा ॥ १८ ॥ असरीरा जीवघणा उवउत्ता दंसणे य णाणे य । सागारमणागारं लक्खणमेयं तु सिद्धाणं ॥ १९ ॥ केवलणाणुवउत्ता जाणंती सव्वभावगुणभावे । पासंति सव्वओ खलु केवलदिट्ठीहऽणंताहिं ॥ २० ॥ णवि अत्थि माणुसाणं तं सोक्खं णविय सव्वदेवाणं । जं सिद्धाणं सोक्खं अवाबाहं उवगयाणं ॥ २१ ॥ जं देवाणं सोक्खं सव्वद्धापिंडियं अणंतगुणं । ण य पावइ मुत्तिसुहं णंताहि वग्गवग्गूहिं ॥ २२ ॥ सिद्धस्स सुहो रासी सव्वद्धापिंडिओ जइ हवेज्जा । सोऽणंतवग्गभइओ सव्वागासे ण माएज्जा ॥ २३ ॥ जह णाम कोइ मिच्छो नगरगुणे बहुविहे वियाणंतो । न चएइ परिकहेउं उवमाए तहिं असंतीए ॥ २४ ॥ इय सिद्धाणं सोक्खं अणोवमं णत्थि तस्स ओवम्मं । किंचि विसेसेणेत्तो ओवम्ममिणं सुणहं वोच्छं ॥ २५ ॥ जहसव्वकामगुणियं पुरिसो भोत्तूणं भोयणं कोइ । तण्हालुहाविमुक्को अच्छेज्ज जहा अमियतित्तो ॥ २६ ॥ इय सव्वकालतित्ता अतुलं निव्वाणमुवगया सिद्धा । सासयमव्वाबाहं चिट्ठंति सुही सुहं पत्ता ॥ २७ ॥ सिद्धत्तिय बुद्धत्तिय पारगयत्तियं परंपरगयत्ति । उम्मुक्ककमकमकवया अजरा अमरा असंगा य ॥ २८ ॥ णिच्छिण्णसव्वदुक्खा जाइजरामरणबंधणविमुक्का । अवाबाहं सुक्खं अणुहोती सासयं सिद्धा ॥ २९ ॥ अतुलसुहसागरगया अवाबाहं अणोवमं पत्ता । सव्वमणागयमद्धं चिट्ठंति सुही सुहं पत्ता ॥ ३० ॥ २२ **स्सस्स । उववाइउवंगं समंतं ॥ स्सस्स * * * * ***